

萬 有 文 庫

第 二 集 七 百 種

王 雲 五 主 編

明 詩 紀 事

(十 二)

陳 田 輯

商 務 印 書 館 發 行

明詩紀事

(十二)

陳田輯

國學基本叢書

明詩紀事卷七

庚籤

董其昌六首

其昌字玄宰華亭人萬曆己丑進士改庶吉士授編修出爲湖廣副使乞歸起山東副使河南參政不赴召拜太常少卿擢奉天寺卿進禮部侍郎拜南禮部尙書告歸起故官掌詹事府事加太子太保致仕贈太子太傅福王時諡文敏有容臺文集九卷詩集四卷別集四卷

容臺集余嘗與趙文敏較各有長短行間茂密千字一同吾不如趙若臨做歷代趙得其十一吾得其十七又趙書因熟得俗態吾書因生得秀色吾書往往率意當吾作意趙書亦輸一籌第作意者少耳余畫與文太史較各有短長文之精工具體吾所不如至於古雅秀潤更進一籌

李日華恬致堂集董宗伯喜以翰墨到處結緣晚年行草灑落終日至不停腕若墨戲則雖片紙未易得請董於繪事宿有重名又當其祕惜時得者應作千黃金想也

玉劍尊聞董玄宰揮毫楷素篋篋如行蠶閃閃如迅霆飛電

畫史會要玄宰山水樹石煙雲流潤神氣具足風流蘊藉推爲本朝第一寫秋山圖自題云秋日樹蕭瑟秋山殊不貧丹楓與黃葉往往媚遊入

列朝詩集。玄宰天姿高秀。書畫妙天下。和易近人。不爲崖岸。庸夫俗子。皆得至其前。臨池染翰。揮洒移日。最矜慎。其畫。貴人巨公。鄭重請乞者。多倩他人應之。或點染已就。僮奴以贗筆相易。亦欣然爲題署。都不計也。家多姬侍。各具絹素。索畫。稍有倦色。則諗諛繼之。購其真蹟者。得之閨房者爲多。精賞鑒。通禪理。蕭閒吐納。終日無一俗語。米元章。趙子昂。一流入也。

無聲詩史。宗伯書無所不仿。最得意在小楷。而懶於拈筆。但以行草行世。亦多非作意書。當其合處。直可追縱晉。魏。畫仿北苑。巨然。千里。松雪。大癡。山樵。雲林。精研六法。結嶽融川。氣韻生動。得於自然。所謂雲峯石迹。迥出天機。筆意縱橫。參乎造化者也。揮格。甌香館集。一峯老人。爲勝國諸賢之冠。後惟沈啓南得其蒼渾。董雲間得其秀潤。

孫承澤庚子消夏記。文敏晚年之筆。全用北苑法。絕不蹈元人一筆一畫矣。

張照天瓶齋題跋。香光居士。筆意冲夷高遠。躡唐人之庭。而入其室。元以後書壇。四百年執牛耳。有以也。

山靜居畫論。畫禪法自董巨倪黃。能師其意而不逐其迹。用墨之妙。尤爲獨詣。

靜志居詩話。趙承旨諡文敏。尙書亦諡文敏。兩公書畫。差足相當。董詩差不知趙。鷗波之亭。戲鴻之堂。風流弘長一也。

田按。文敏書畫集大成。完明一代已殘之局。開國朝之先聲。四王。吳。惲。首推煙客。卽文敏指授者也。國初書家無不學董者。集中小詩題畫。亦楚楚有致。

自畫吾松小崑山

崑山雖婉變。卻似魯家邱。故作廬峯勢。青天瀑布流。

長松高士圖

虬松繡青銅。峭壁立積鐵。下有逃虛人。長嘯空山裂。

題畫

幽人茶竈煙。每與宿雲亂。憑軒望所思。春潮渺無岸。

酬黃侍御

疏露微雲落葉前。新詩格外倍清妍。涪翁句法依然在。管領家風五百年。

畫家霜景與煙景淆亂。余未有以易也。丁酉冬燕山道上。乃始悟之。題詩驛樓。

曉角寒聲散柳隄。千林雪色亞枝低。行人不到邯鄲道。一種煙霜也自迷。

題倪雲林畫

洞天深靚祕清都。彷彿羣真在玉壺。若個丹青能幻出。倪迂端勝米於菟。

李日華十一首

日華字君實。嘉興人。萬歷壬辰進士。除九江推官。謫汝州判官。遷西華知縣。以憂歸。起南禮部主事。乞歸。起北禮部主事。未赴。進尙寶司丞。遷太僕少卿。有恬致堂集四十卷。竹懶畫媵二卷。續畫媵一卷。薊旋錄一卷。

六硯齋二筆。每歲蓮出透水。未及葉際。爲驟雨所淋。輒中天。余出新意。剪荷葉。編縫之作兜鑿狀。名曰蓮笠。雨前遍覆之。良有濟也。戲詠之曰。欲展淩波步。先爲行雨裝。擘羅深覆額。擁髻悄藏香。莫倚傾珠蓋。應同裹玉囊。自憐嬌小甚。脈脈待恩光。

竹籬畫簾。余繪事萬不足稱。然有留意者。亦頗瀾之。嘗有題句云。畫成未擬人將去。茶熟香溫且自看。亦可笑也。

紫桃軒又綴。宋司馬待制行色詩云。冷於陂水淡於秋。遠陌初窮到渡頭。賴是丹青無畫處。畫成應遣一生愁。人皆賞其描抹。余亦有送人一詩。初非襲其意。而落句不得不據及之。詩云。故人江上去。我登江上樓。江南花片雨。灑灑送行舟。棹入蘼蕪際。望窮煙樹頭。盈盈一段意。畫出使人愁。

列朝詩集。君實和易安雅。恬於仕進。後先家食二十餘年。能書畫。善賞鑒。一時士大夫風流儒雅。好古博物者。祥符王損仲。雲間董玄宰爲最。君實書畫亞於玄宰。博雅亞於損仲。而微兼二公之長。落落穆穆。韻度頹然。可謂名士矣。君實嘗書其畫簾曰。白石翁詩。沈卓雄快。直闖杜陵營壘間。奪其兵符。俯視一時作者。不堪偏裨位置。乃其詩多於所作墨戲。林巒樹石。花鳥蟲魚。間見之。片語挑焰。生動躍然。石翁澹於取名。無意傳其詩。而詩與畫皆盛傳。是翁之詩以畫壽。非以畫掩也。此君實寄託之語。然其論白石翁之詩。亦可謂之具眼矣。

無聲詩史。君實著述甚富。工於詩。妙於書。精於畫。所著紫桃軒雜綴及畫簾諸編。文雖小品。自足供藝林幽賞。

靜志居詩話。太僕恬淡自持。居官日淺。優游田里。以法書名。畫自娛。家近春波橋。爲吳仲圭舊里。暇寫墨竹。兼擅雲山。其詩非選非唐。別裁風格。頗與王辰玉。陳仲醇同流。微尙纖豔。近家宴集語。

山靜居畫論。竹懶道人畫。仗其詩以發妙意。可謂夙世詞客。前身畫師。

田按。君實墨戲不多。見觀六硯齋筆記。紫桃軒雜綴論書論畫。自是通品。小詩跌宕風流。由其性情通脫。人品高妙。故吐屬不凡。雖時近俳體。亦玩世之一端也。余讀其蕪旋錄云。天啓中。接除書補北膳司。俄晉鹽丞。趨命受事。五閱月。瑋燄日熾。士大夫儒者染濡。強者摧折。亟覓差以出。此可爲處亂世之前鑒也。

題沈石田溪閣圖

虛閣延朝爽。高梧翻晝涼。流觀廬岳記。箋釋漢宮香。雲影落懷好。山情對酒長。秋來多秀句。門外是瀟湘。

秋日獨坐懷南湖醉游

秋雨淡無色。高梧翻晝陰。鳥來窺散帙。客到罷彈琴。世態交游見。風期山水深。湖南好風月。夢裏亦追尋。

贈當湖何澹寰二尹彭澤人

君別五株柳。來分半縣花。押奇雲作判。廚冷雪供茶。束帶了公事。開尊玩物華。家傳水曹句。高詠入青霞。

伏日寫子久溪山秋意

秋山晴露骨。木葉正蕭騷。日暮牛羊下。天空雁鷺高。村墟遙隔隴。浦溆曲通濠。採藥栖真者。塵名自可逃。

題畫竹

石壁霜雪氣。竹枝風雨聲。六月虛堂夢。騎龍到赤城。

題畫

黃葉滿秋山。白浪迷秋浦。門前一痕沙。白鷗近可數。

中秋後二日傲梅道人筆意

木葉陰多漁繫艇。蘆花風急雁低行。相逢恐是玄真子。一縷茶煙繞筆牀。

贈張都督

花月秦淮嘯詠高。海波痕漬在征袍。嫵姚雙鬢青如許。醉擁吳姬看寶刀。

題畫

樹交陰處坐斜曛。爲有風泉隔嶺聞。家在前峯孤絕處。半床落葉半床雲。

題寫梅石

珊瑚橫斜海波澗。風吹乾雲高峯巒。玉妃訴冷出珠宮。一鳥忽颯山月落。

舟中題畫

孤亭芳草悵天涯。鷺羽新波鴨嘴沙。積雨春寒難破遣。似聞消息到梨花。

邢侗七首

侗字子愿。臨邑人。萬曆甲戌進士。除南宮知縣。徵授御史。出爲湖廣參議。遷陝西行太僕少卿。有來禽館集二十九卷。

大泌山房集。少卿書法鍾、王、虞、褚、顧、米、禿、素。而深得右軍神髓。極爲海內所珍。內豎以字扇進覽。上欣賞。命女史學其書。邢司馬平倭至高句麗。有李狀元妻託致意。愿爲弟子。朱宗伯出使。從人適攜其字二幅。購之黃金同價。琉球使者入買。愿小留買邢書去。

列朝詩集。子愿先世席資鉅萬。美田宅。甲涉水上。子愿築來禽館。在古犂邱上。讀書識字。焚香埽地。不問家人生產。四方賓客造門。戶屢恒滿。減產奉客。酒鎗簪珥。時時在質庫中。晚年書名益重。購請墳咽。碑版照四裔。妹慈靜。善仿兄書。家僮戴祿。亦通

六書之學。同里王尙書洽。集子愿書。刻來禽館帖。濟南風流文彩。幾與江左文董。先後照映。

無聲詩史。子愿臨池之學。規摹二王。筆花娟潤。如時女步春。秀骨楚楚。間寫文石。亦藝林片玉也。

圖畫寶鑑續纂。侗善作荆草拳石。筆之古秀煙潤。庸史孰能及焉。

靜志居詩話。子愿雖詩名爲書法所掩。其言曰。詩盛於嘉隆。七子以爲盡詞人之變矣。然效趨者高趾。促柱者急張。往往不病而呻吟。匪樂而強笑。江河日下。七子之盛。七子之衰也。蓋深中時流之弊。特其自撰不見脫穎耳。

山左明詩鈔。來禽館詩氣體清逸。風神隱秀。漁洋山人云。夾禽夫子本神清。非虛語也。

田按。子愿詩。神清體弱。能張書苑。不足以踞騷壇。以較玄宰諸詩。差爲過之。

寄李本宙

春色濃如許。梁園歌落梅。晚風將笛韻。吹度九河來。我夢杏梁月。君情深楚臺。兩鄉常好在。滄海涸爲杯。

端月送陳東父之陽邱謁董明府

若榴朝泛酒。送子出重關。問渡大清水。逢人小朗山。南風吹憶夢。赤日著愁顏。莫忘并州路。期君楓葉斑。

吊宋叟二首

僑寓江陵日。徐陵作郡年。重來滄海上。依舊孝廉船。醉齧松枝雪。狂吟桂樹篇。浮生無住著。駘蕩白雲天。憶別來禽館。曾言葬汨羅。落花留且住。芳草奈君何。吊死文姬怨。山人悲生薤露歌。茫茫江水闊。應比淚痕多。

走筆戲贈萬伯修使君

五花胡馬鶴鸞裘。夜獵歸來興未休。教唱西涼新樂府。一時霜月遍幽州。

題管夫人山樓繡佛圖

竹繞層樓胃網蛛。絲絲縷縷貌曇瞿。勅來素面流輕粉。尙衣羊肝半臂無。

池北偶談。祁縣戴楓仲藏管夫人道昇小畫幀。有細書十字云。山迴新綺閣。竹掩舊朱門。邢子愿大僕有詩云。

乞趙司徒竹

北人不識篔簹種。我有渭川常滿胸。趙家亭子分千箇。明歲應來看籊龍。

王思任三首

思任字季重。紹興山陰人。萬歷乙未進士。除興平知縣。改當塗。青浦。遷袁州。推官。徵授南刑部主事。改工部。歷郎中。出爲江西僉事。魯王時。除禮部侍郎。兼翰林學士。有避園擬存律。陶廬遊詠。

列朝詩集。季重有儁才。居官通脫自放。不事名檢。性好譁浪。居恆與狎客縱酒談笑大噱。遇達官大吏。疏放絕倒。不能自禁。好以詆諧爲文。做大明律製奕律。吾以爲必傳。故舉。郭舍人之流也。亂後跟踰避兵。猶負一棋局以往。遂死於山中。季重爲詩。才情爛熳。無復持擇。入鬼入覓。惡道全出。鍾譚之外。又一旁派也。

靜志居詩話。季重滑稽太甚。有傷大雅。

無聲詩史。季重好爲古文詞。滿滌塵稅。務臻險秀。東南髦俊。推爲風雅宗盟。出其蘊思。寫山水林屋。絳染滄鬱。超然筆墨之外。

猶記其評天台云。孤月洞庭。正爾寂然。忽有天山萬里。一夜飛來。又云。恍忽幽玄。不記何代。片時坐對。人化爲碧。觀此數語。則季重之畫不遠矣。

田按。季重詩。揚竟陵之餘波。如入幻國。詭變莫窮。如遊深山。魑魅出現。真亡國之音也。閱竟避園擬存。惟于忠肅墓社稷留還我頭顱。擲與君二語。差堪把玩耳。廬遊詩稍近人。錄三首。

門家堰夜泊

一葉滄江上。錢塘已曙開。不知幾信宿。仍復此徘徊。山色天邊盡。雞聲潮裏來。榜人緣底事。風起喚帆催。

泊篠簪

篠簪何年埤。維牽十數橋。人家藏曲岸。古渡喚斜陽。水緩辭春力。田礪領芋秧。土風雖樸易。王粲只思鄉。

宿怡雲閣

復陶重擁覺仍單。一枕溪聲落萬灘。怪絕天雞無唱處。客星已犯斗牛寒。

胡宗仁二首

宗仁字長白。一字彭舉。上元人。有知載齋集。

隱秀軒集。彭舉諸體詩。輕重古今。出沒正變。有王孟之致。畫幽澹蕭遠。多人外之趣。

懶真草堂集。彭舉工詩。善草隸圖畫。其詩寤寐古人。而不爲影襲。往往率胸懷出之。清奇澹宕。不染世縹氣。

嶽歸堂集。彭舉年六十餘。坐起一齋。藤垣苔屋。冲然無慮。然未免爲人作畫。綠飾於雲林。大癡。叔明間。而疏疏自運。居然有逸

士之度。彭舉之詩。老枝少葉。自寫其質性之所近。則自吾數人外。誠莫有知之者。

露書。彭舉詩。如空山泉落。薄晚霞明。

列朝詩集。彭舉隱於冶城山下。生而偉壯。美髯。晚年衲衣拄杖。反手徐步。鬚髯從風飄颻。人皆目爲神仙。喜談論。作畫師雲林。子久。本富家子。老而食貧。不謁時貴。嘗詠唐六如詩。閑來自寫青山賣。不使人間作業錢。殊自得也。有詩二千餘首。鍾伯敬爲論定。余見其手稿。每自誇其寒星徹夜。明月爲我至。以爲神來之句。亦可見其清意也。

讀畫錄。長白畫自文武峯。伯仁來。晚出入王叔明。黃子久二家。其筆意古質。頗有五代以前氣象。八分書學禮器碑。無一點俗態。長白畫所傳最少。余與其姪元潤交廿年。冊中僅得二幅。當時矜貴可知矣。長白與伯敬札子云。寒門諸子弟皆學畫。蕙門畫掩茗椀爐香間。閣筆盈案。妄擬堆笏滿床。昔人一門五貴。七葉蟬聯。想如是耶。公聞之得無噴飯。詩極爲竟陵所賞。如花落竹堂靜。煙消石屋空。殘月半窗白。寒星徹夜疏。一水帶寒月。孤村暮夕烟。貧惟尊酒在。詩豈衆人傳。人從淺水過。路向半山通。岸楓紅隱寺。湖水碧連山。渚雲乍去猶拖水。山月初生不過林。皆詩中畫也。惜無力板行。

靜志居詩話。彭舉詩頗清真。

閒居寄友

家住青溪曲。春深花竹迷。君來不相問。直過石梁西。屋壁峯陰合。門籬槿葉齊。蕭然半迂事。課水灌園畦。

春晚喜晴

高樹風流欲散陰。坐來爽氣漸能深。渚雲乍去猶拖水。山月初生不過林。有鶴日閒眠古石。無人時到抱清琴。明朝雙屐尋芳去。花隴乘春看翠岑。

米萬鍾一首

萬鍾字仲詔錦衣衛人萬歷乙未進士除永甯知縣改銅梁六合徵授大理評事遷戶部主事歷員外改工部進郎中出爲浙江參政歷江西副使山東參政以忤魏璫削籍崇禎初起太僕少卿有澄澹堂文集十二卷詩集十二卷

書史會要仲詔行草得南宮家法筆更沈古與華亭董太史齊名時有南董北米之目尤善畧書擅名四十年書蹟滿天下獨不爲權貴作一字魏璫時嚴拒其請卒罹黨禍不恤其高勁如此

畫史會要太僕性好奇石羅致不遠數千里人號友石先生著有石史十六卷寫硯山向背巖壑無不精具皴擢極幽秀殆舉筆而思可傳者山水得倪迂法花卉似陳伯陽

無聲詩史友石繪事楷模北宋以前施爲巧瞻位置淵深不作殘山剩水觀蓋與中翰吳彬朝夕探討故體裁相彷彿焉

孫承澤春明夢餘錄古雲山房米太僕萬鍾之居也太僕好奇石蓋置其中最著者爲非非石數峯孤聳儼然小九子也又一黃石高四尺通體玲瓏光潤如玉一青石高七尺形如片雲欲墮後刻元符元年二月丙申米芾題又有泗濱浮玉四篆字太僕嘗以所著石令閩人吳文仲繪爲一卷董元宰李本甯嘗爲之題古今好石者自襄陽後人趣稱太僕云

靜志居詩話先生爲水曹郎築園海澱之北中有色空天太一葉松埤翠葆樹林於澁總名之曰勺園又曰風煙里自念園在郊關不能日涉因繪園中景爲燈即壑亭臺纖悉具備都人爭尙之號曰米家燈嘗於元夜集客賦詩麗水呂太常邦耀卽席口占二首其一云玉綃疊出上元村雙炬懸來景物繁恍惚重遊邱壑裏米家燈是米家園其二云輕舟寒夜渡無冰波入銀綃訝月升宛似夢中曾一照米家園是米家燈一時和者數百人列成一集可稱好事亦太平佳話也

漫園初成

紀勝無勞出郭輿，臥遊眺聽日堪書。嵐衝石髮縈山帶，梵挾松弦韻木魚。狎主風煙俱老大，慣親鷗鳥獨迂疏。偶從圖畫新摹得，疑向江鄉乍卜居。

魏之璜一首

之璜字考叔，上元人。

畫史會要之璜寫山水不襲粉本，自規規制，巖壑樹石，特標靈異，晚用濃墨突筆，意貴蒼老，稍輪風韻。

列朝詩集考叔起孤貧，業丹青以糊口，少不知書，因備書通寫文義，遂能爲詩，清迥絕俗，而不以詩名，以畫掩也。

冬夜同陳康侯秦京集畢康侯樓

不憚通宵坐，因思聚首難。簾疏霜氣薄，燭短漏聲殘。載見一回老，相逢各盡歡。殷勤今夜酒，莫使後期寒。

莫是龍六首

是龍字雲卿，以字行，更字廷韓，松江華亭人，以諸生貢入國學，有石秀齋集十卷。

藝苑卮言是龍小楷精工，過於婉媚，行草豪逸有態。

何三畏漱六齋集，廷韓於詩宗唐，語語煙霞，於書法無所不窺，而獨宗羲、獻、宗、米，小楷宗鍾、繇，於畫宗黃、大癡，極意做摹，不輕落筆，點染成幅，人爭購之。

列朝詩集，廷韓有才情，風姿玉立，少謁王道思於閩，道思贈詩云：風流絕世美何如，一片瑤枝出樹初。畫舫夜吟今客駐，練裙

畫臥有人書。其風致可想也。廷韓妙於書法。常作送春賦。手自繕寫。詞翰清麗。皇甫子循。王元美皆激賞之。

靜志居詩話。廷韓詩。書法。皆不見出羣。五律稍勝。

唐孫華東江文集。廷韓詩。華瞻敏給。刻燭擊盞。操觚立成。
田按。廷韓作畫。必坐密室。染就。不令左右賓友知之。及工甚。乃出以視人。故流傳甚少。詩長於五言。而七言散漫無神采。亦才有偏勝也。

美人愁鏡

翠樓久不開明妝。寶鏡出匣無輝光。春風吹濕春山黛。暗損紅顏破花態。當年妾有如花姿。今日花枝非舊時。落花不解傷春去。鏡裏春愁妾自知。

溪山草堂偶成

眺望郊原外。悠然遠俗襟。逕荒苔蘚合。門掩薜蘿深。花氣侵虛幄。川光動隔林。江鷗莫相畏。我已息機心。

題寫經菴

小築招提隱。弘標卓朗風。珠林問龍象。金簡映魚蟲。翰墨春雲外。湖山夕照中。不須離五濁。卽此悟三空。

送顏別駕之江州

因看佩刀色。慘澹惜離羣。一騎侵殘雪。千峯出亂雲。到官山水郡。問俗楚吳分。容易論傾蓋。天涯又別君。

妓館送客

南國送歸人。帆前又暮春。還家江草綠。埽徑落花新。金谷當年樹。武陵何處津。更憐箏畔語。小婦是西秦。

訪徐文卿園居

舊隱竹西頭。青春事事幽。日高猶謝客。花落始關愁。揮手平原飲。行歌楚澤游。還嫌近城郭。早晚託漁舟。

鄒迪光四首

迪光字彥吉。無錫人。萬曆甲戌進士。除工部主事。歷員外郎中。出爲黃州知府。遷福建副使。左遷浙江僉事。改湖廣。有鶴鶴稿。玄嶽遊。屨提齋。鬱儀樓。始青閣。石語齋。調象菴等集。

列朝詩集隆萬間。王弇州主文章之盟。海內奔走歛服。弇州沒。雲杜回翔羈宦。由拳潦倒薄游。臨川疏迹江外。於是彥吉與雲間馮元成乘間而起。思狎主晉。楚之盟。長卿游戲推之。義仍亦漫浪應之。二公互相推長。有唐公見推之喜。彥吉沾沾自負。累見於詞章。而又排詆公安。并撼眉山。方爲弇州護法。蓋欲堅其壇壝。以爲後山瓣香之地。則尤可一笑也。長卿通脫。多可而少。怪義仍孤峭。心薄王。李鄙其尸盟。次睢之社。朱弓之祥。歸於不知何人。領之而已。非其所屑意也。二公晚交於余。而義仍亦有微詞相間。并及雲杜。詞壇爭長。等於鬩觸。今皆成往。規事矣。彥吉之詩。優於元成。點綴風雅。亦復可觀。

畫史會要。彥吉寫山水。脫盡時格。一樹一石。必求精妙。蓋力追宋元人之用心也。

無聲詩史。彥吉著述之暇。出其緒餘。以染絹素。咄咄大。小米。倪黃間。

靜志居詩話。彥吉詩材庸熟。望而生憎。絕句差清婉可誦。

田按。弇州序彥吉屬提齋詩。頗致推挹。又收之四十子之列。弇州喜人附和。故不惜齒牙餘論。彥吉遠欲繼其壇坫。無怪虞山之目笑存之也。

愚公谷雨後觀泉

雨腳一淋漓。水勢遂縱送。風泉互勞攘。水石兩倥傯。歷堰曾幾何。爲壑固已衆。有時傳玄車。鎮日漢叟甕。但聆雷霆聲。誰辨人語闕。枕漱良在茲。生涯寄巖洞。

春申澗第一曲

從二泉亭西折入。陜道古木數株。猗靄繚蔚。梳風颺瀏。凡二百武許。而得余園門之榜。曰愚谷。入門有一亭。據水口。是爲春申澗第一曲。澗所從注。不大猛厲。而引入吾園。則甚怒張。當其洶湧時。直躍亭額而過之。

澹澹亭

移山力旣殫。決流勢且厲。爲水一衣帶。居然千里勢。水石兩排盪。響似雲中遞。春申不可卽。臨流嘆川逝。澹澹亭。澗自一曲而下。如建瓴然。凡爲障者七。而此其一也。亭其上曰澹澹。雨過。泉走亭下。鼓唇瀟瀟。飛洒人面。政所謂澹澹不絕。流爲江河也。

塔照亭

厓隤立石聳。虹梁架其間。羣霓紛下踞。昂首欲奮騫。潰沫散飛霰。震霆鼓青天。汨汨一何駛。澹澹使之然。頻伽嶺上有亭。名塔照。凡三楹。九龍爲辰。錫山作案。下有方塘。含青受綠。錫山木樹駢羅。密不見

體一塔從中擎出。僅得四層。陽烏西匿。返照注射。作黃金色。是吾園最勝處。

後峯極巖。前嶺復秀。整嶺樹蔚以蒼。儼然設畫屏。浮屠從中出。白雲爲項領。返照注射之。大地琉璃影。

曹履吉二首

履吉字元甫。當塗人。萬歷丙辰進士。授戶部主事。歷員外郎中。出爲河南僉事。遷參議。擢光祿少卿。有博望山人漁山堂。攜謝閣青在堂。辰文閣等集。

畫史會要履吉山水師倪元鎮。筆力高雅。評者有玉潔冰清之語。真逸格中第一人也。詩字亦有唐晉逸韻。

藏雲晚步

淺深叢綠隱僧迦。過雨新泉出徑斜。獨倚山門看歸鳥。幾羣揉落白桐花。

將出都爲戴魯生作小景

京塵何似故江鄉。近岫高林列幾行。寫到凌歊溪曲處。一天秋雨打西窗。

黃克晦五首

克晦字孔昭。惠安人。有吾野詩集五卷。

閩書孔昭家貧學畫。復肆力爲詩。畫筆著勁。閉戶經月成者。尤可傳世。

筆精。孔昭詩清峭絕塵。其他秀句。不可殫述。如得酒有時還罵坐。遊山無處不依僧。老知白璧投人暗。貧笑黃金結客稀。客中良晤秋三五。水底青天月一雙。江湖結客名終在。風雨還家夢未真。水帶平蕪雙鳥下。雲連遠寺一僧歸。語語新俊可喜。

靜志居詩話。孔昭金陵遊藁。張仲立刊之西山。倡和編。李于美定之。金臺詩。林登卿鐫之。登卿稱其古風。天籟自鳴。近體森然。紀律。青溪社集諸公。允當推爲祭酒。

田按。孔昭詩才清拔。畫不多見。

惠陽傷亂

東粵重來倍黯然。荒村古堡暗蒼煙。山中故老無歸業。水上新民未種田。江燕春深巢樹腹。野狐日落吠溪邊。東風那管亂離事。草色藤花似往年。

海珠寺

十載珠江又一樽。涼風萬里灑江門。客談遺事猶能記。僧恨留題已不存。暝色未沈天外樹。月光欲動水邊村。孤亭坐久人聲絕。明滅漁燈兩岸昏。

寒夜憶張星湖

蒹葭霜落夜迢迢。江水無風也自搖。正憶高樓坐逋客。時聞險語出層霄。隔橋人語三家市。近浦雞聲半夜潮。新酒滿樽懷我否。可無白鶴一相招。

桃溪夜泊

清霜夜落武陵溪。水上蒼煙十丈齊。野爨冷燒紅葉火。村春寒接五更雞。不眠枕上多新得。所過山中有舊題。記問人家沽酒處。人家只在小橋西。

夜宿陳爾昭竹溪山館得西字

迴磴斷橋山日西。高楓葉赤飛滿蹊。一家村巷到始覺。千樹花源行轉迷。野夫欺虎度林黑。沙鳥隨人穿竹低。欲移衾枕抱雲宿。月白天雞空裏題。

宋珏一首

珏字比玉。莆田人。國子生。有宋比玉遺稿。

宋珏荔支譜。予與周六郎嘗荔支酒詩云。釀得荔支酒。泥頭爲汝開。香風繞屋散。翠色撲巖來。擬若春初芥。方花雪後梅。一斟三贊嘆。坐看玉山頽。

列朝詩集。比玉善八分書。規撫夏承碑。蒼老雄健。骨格斬然。畫出入二米。仲圭子久。不名一家。爲詩才情爛漫。信腕疾書。不加持擇。

無聲詩史。比玉寫山水及喬柯文石。行筆雄秀。兼善臨池。

漁洋詩話。比玉善八分。而小詩亦工。嘗記其一絕云。來時梅瘦未成花。別後垂楊金作芽。他日相思如見畫。板橋西望是吾家。陸時化吳越所見書畫錄。比玉少爲諸生。負笈入太學。性好遊。不歸故里。寓於武林。金陵吳門。爲人志意高廣。以文章爲心腑。以朋友爲骨肉。以都會爲第宅。以山水爲園林。以詩賦爲職業。以翰墨爲娛戲。善八分。畫不名一家。好爲詩。縱橫穿穴。信手爲之。

田按。比玉讀金陵俞仲髦荔枝辭戲作。有孫樵褒城驛題壁遺意。

讀金陵俞仲髦荔枝辭戲作五十四韻

俞公晚好事。垂涎及荔枝。願貶楓亭驛。甘作驛丞卑。安意荔熟日。端坐飽噉之。事有謬不然。傾耳聽我詞。楓亭閩孔道。迎送無停時。漳泉貴宦多。暑行喜夜馳。東迎接不及。南送已嫌遲。炎天夫馬缺。每被豪奴笞。此亦丞常分。受辱其所宜。及至荔枝熟。苦情公不知。驛庭只四樹。樹老半枯枝。每歲貢上官。皆派丞往齎。歲有熟不熟。上官循舊規。十萬獻撫按。百萬分三司。四郡大鄉官。例亦有餽遺。張家賒數擔。李家復挪移。封緘青籠內。渡江敢辭危。伺候烈日中。暈死敢言疲。門吏急使用。乃得進丹墀。不然香氣變。色味復差池。小則受箠楚。大則冠袍褫。上官幸色喜。歸見妻孥悲。荔枝有此苦。誰說甜如飴。公思噉尤物。一事頗燥脾。莆多荔枝園。園丁健可爲。五月六月交。朱實已纍纍。販子已採摘。園丁不暫離。中搭四柱樓。夜以防偷兒。園丁臥樓中。兩手如懸槌。珊瑚爲我幄。碧玉爲我帷。園林悄無人。惟有涼月窺。伸手即可摘。摘食復奚疑。飽卽捫腹臥。恬若陳希夷。旣不費金錢。又無人把持。清福如此享。神仙亦妬其。家家亦有園。宋香品最奇。崔亭與粵山。霞墩及東陂。陳紫比毛嬙。江綠匹西施。年年皆遍嘗。題咏壁淋漓。自署荔仙人。不羨加太師。無端客鍾陵。十載殫歸期。荔熟必入夢。醒來空嗟咨。無罪坐自囚。無官反自羈。言梅甯止渴。說餅豈療飢。清福不得享。作計無乃癡。昨爲人寫生。費墨及胭脂。今復弄紙筆。揮汗作此詩。詩以嘲俞公。因之以自嗤。

盛時泰七首

時泰字仲交。上元人。貢生。有大城山堂集六十八卷。

顧起元懶真草堂集時泰畫竹石枯木蒼然映人

烏衣佳話雲浦盛仲交有逸才有妙賞博學多聞落筆成詩文不煩點定枯木竹石可亂元鎮真迹

金陵瑣事吳中黃淳甫與姚元白盛仲交在竹素山房擁爐分韻賦春雪仲交得韻點筆成詩淳甫索觀仲交不與笑曰若先

飲一卮遇可觀淳甫遂飲一卮仲交詩云三冬寒始盡初陽氣尙微誰言六出後猶作五花飛入柳鶯棉早粘梅訝蕊肥座中

同詠客誰是謝元暉二君極喜頸聯之工

列朝詩集仲交才氣橫溢每有撰述紙筆伸紙溶溶不休紙盡則已善畫水墨竹石居近西冶城家有小軒文徵仲題曰蒼澗

以仲交畫法倪迂沈啓南有筆蹤要是存蒼澗畫法還應入有無之句也骯髒歷落不問家人生產卜築於大城山中又愛方

山祈澤之勝咸有結構杖策跨驢欣然獨往家人莫能迹也嘗爲子娶婦其婦戒勿他往薄暮友人邀往城南古寺閱數日乃

歸婦慍而詈之乾笑而已張肖甫開御史臺於句容仲交大醉搥懸鼓於戟門肖甫曰安得有此狂生必盛仲交也邀入痛飲

達旦而別萬歷改元以陪貢入試吳下肖甫曰子過姑蘇必謁王元美仲交遂攜所著兩都賦謁元美於小祇園元美贈之詩

曰遂令陸平原不敢賦三都

田按仲交畫師寶幢居士余嘗見仲交作寶幢居士碑頗有六朝人標致律絕風調翩翩大篇殊乏精采牧齋謂仲交擬古七

十章三日而畢元美爲之氣奪余謂太原公子見虬髯公當不爾爾

吳崑麓蓄倪幼霞王叔明諸名畫雨中有懷奉柬

隨軒犀軸在古墨黯生光京國風沙滿圖書意興長閉關耽宴坐畏客自焚香若許鄰人見衝泥過講堂

次高郵

淮樹晴看小湖風晚覺腥臨流迷野燒隔岸見漁舲一棹浮空入千山影翠行漸知南國近應緩別家情

同金子坤陪羣公登雨花臺

紺殿珠宮結駟行。登臺共豁遠遊情。林花雨霽雙峯出。雲木涼生一鳥鳴。禁苑晡煙開樹色。秦淮春水長潮聲。卻因楚使誇雲夢。愧作諸生賦帝京。

望凭虛閣外山色贈詹東圖因寄陳仲魚

春雲如黛點鍾陵。湖水生波盡解冰。幾處東風迴弱柳。千岩雨色潤垂藤。香筵寶座初聞梵。塔院蓮龕正試燈。閣上莫辭同醉酒。望中原草漸層層。

寒夕

春寒向夕劇。下馬及邯鄲。逢著娼家女。琵琶帶笑彈。

憶高常侍

隱身博徒中。才名自能遠。三日官封邱。秋風意不淺。

城山六言

微雨纔沾麥腳。輕風剛報花枝。田舍春光幾許。江南上巳臨時。

吳彬一首

彬字文中。莆田人。以善畫授中書舍人。

五雜俎。文中人物佛像。遠卽不敢道。子近亦足力敵松雪。

畫史會要。吳彬山水。布置絕不摹古。最爲出奇。

圖繪寶鑑續纂。吳彬人物形狀奇怪。迥別舊人。自立門戶。白描尤往。筆端秀雅。神宗稱賞之。御府有藏。外傳甚少。

無聲詩史。文中畫法。宋唐規格。布景縝密。傅采炳麗。雖棘猴玉楮。不足喻其工也。曾繪月令圖十二幅。如上元。清明。端午。中秋。

重九之類。每月各設一景。結構精緻。細入絲髮。若移造化風候。入節四時於楮素間。可謂極其能事矣。佛像尤其所長。雖以藝

雄畫苑。然頗負氣節。天啓間。閱邸報於都門。見魏璫擅權之旨。則批評而訾議之。被邏者所偵。逮繫削奪。亦清流也。其畫品可

頡頏丁雲鵬。亦間用篆款。

關陔詩話。文中精畫理。神宗時。入爲供奉。請乘傳入蜀。觀劍門。峨眉之勝。下筆益奇。

秋山圖

草閣無塵秋正深。客來款坐且閒吟。煮茶旋埽山間葉。時有流泉漱玉琴。

明詩紀事卷七下

庚籤

陳繼儒八首

繼儒字仲醇華亭人有眉公集六十卷。

列朝詩集仲醇少爲高才生與董玄宰王宸玉齊名年未三十取儒衣冠焚棄之與徐生益孫結隱於小崑山仲醇爲人重然諾饒智畧精心深衷妙得老子陰符之學婁東四王公雅重之兩家子弟如雲爭與仲醇爲友惟恐不得當也玄宰久居詞館書畫妙天下推仲醇不去口海內以爲董公所推也咸歸仲醇而仲醇又能延招吳越間窮儒老宿隱約饑寒者使之尋章摘句族分部居剽取其瑣言僻事蒼葦成書流傳遠邇款啓寡聞者爭購爲枕中之祕於是眉公之名傾動寰宇遠而夷酋土司咸丐其詞章近而酒樓茶館悉懸其畫像甚至窮鄉小邑鬻拒枚市鹽豉者胥被以眉公之名無得免焉直指使者行部薦舉無虛牘天子亦聞其名屢奉詔徵用年八十餘卒於佘山之精舍自爲遺令纖悉畢具歿後降乩詩句預刻時日貯篋衍中其井井如此仲醇通明俊邁短章小詞皆有風致智如矢驟用之不窮交遊顯貴接引窮約茹吐軒輊具有條理以仲醇之才器早自摧息時命折除聲華浮動享高名食清福古稱通隱庶幾近之玄繻物色章滿公車動以康齋白沙爲比謂本朝正史當虛席以待筆削耳食承譌斯固可爲一笑而一二儒者必欲以經史淵源之學引繩切墨指摘其空疏而糾正其驕駭亦豈通人之論哉小詩便娟輕俊聊可裝點山林附庸風雅評臆仲醇者亦應作如是觀。

靜志居詩話。仲醇以處士虛聲。傾動朝野。守令之臧否。由夫片言。詩文之佳惡。冀其一顧。市骨董者。如赴畢良史推搗。品書畫者。必求張懷瓘估價。肘有兔園之冊。門闌鸞羽之車。時無英雄。互相矜飾。甚至吳綾越布。皆被其名。龜妾餅師。爭呼其字。今遺集具在。未免名不副其實焉。

書史會要。繼儒書法。蘇長公。故於蘇書。雖斷簡殘碑。必極搜採。手自摹刻之。曰晚香堂帖。容臺集。眉公胸中素具一邱壑。雖草草潑墨。而一種蒼老之氣。豈落吳下畫師恬俗窺境。

田按。眉公小詩頗有別趣。鑒賞亦是當家。至其虛名傾動市朝。孔稚圭所謂林慙澗愧者也。

園居

一自謝塵鞅。春風吹好顏。鉤簾通白鳥。隱几夢青山。上客初回駕。門人莫掩關。日斜桑柘外。耕者正閑閑。

贈秋潭僧

人與寒雲淡。身如秋葉輕。非關住禪寂。兼欲遣詩名。蘿月亂潭影。松風遞茗聲。爲憐苔蘚碧。不敢下階行。

花朝

美滿春眠起較遲。五更常失圮橋期。愁添白髮餐雲母。戲寫青山付雪兒。媛玉棋消千日酒。冷金箋寫百花詩。近來學得長生訣。一味賣馱兼賣癡。

寄戚都護

一從銅虎出中朝。坐見匈奴氣不驕。表賜尚方新靺鞨。羽傳西域舊驃姚。比年大宛無留馬。何處陰山有

射鵬獵罷中原賓客散。閉門冰雪日蕭蕭。

秋泛

太湖月出杳冥冥。辦得漁蓑上釣舲。兩岸芙蓉一聲笛。侍兒新賜號樵青。

贈山叟

有箇小扉松下開。堂前蔬藥繞畦栽。老翁抱孫不抱甕。剛欲灌花山雨來。

題壽安寺壁

灌木陰陰殿角斜。寺門一帶好人家。春潮退後溪風急。破網無魚挂落花。

梅花

小鬢清曉報花開。無數梅花照鏡臺。好揭紫絲新步幃。紅兒捧取綠珠來。

郭造卿五首

造卿字建初。福清人。諸生。有海嶽山房存彙十五卷。

陳黼元凱集。建初詩。曠遠閒逸。歸於麗則。

田按。建初遊戚元敬幕府。燕史百卷。客感暮時作也。五七言近體。句鍊調穩。猶是閩人成派。

懷王觀洛宗堯

春風一別後。伏枕兩驚秋。客裏相思夢。燈前獨寐愁。詩成空對酒。興發但登樓。何日攜孤劍。從君洛下遊。

懷族兄江北山人

歸舟江上憶蒹葭。搖落懷人歲事賒。遠道空囊猶作客。暮雲孤影更思家。燈前夜雨催新酒。門外秋風墜落花。清夢幾迴春草綠。好將佳句寄天涯。

同王仲房塞外贈別

憐君白首正悲秋。萬里辭家出塞遊。見道幕南空部落。誰云漠北是邊州。寒城月白驚刁斗。衰草雲黃隱戍樓。偏憶江東高臥處。蒹葭甯爲故人留。

之金陵至建州寄懷諸子

客子孤裝向秣陵。好懷無處不登臨。青山已動高人興。碧水長流去國心。劍浦春星辭淺瀨。建溪夜雨宿荒林。半生漂泊應如此。何處因風寄好音。

甯德重陷志感

鼙鼓頻年客夢驚。又聞羣盜陷孤城。愁人掩淚看烽火。野老吞聲問死生。羽檄幾回馳節鎮。牙璋尙爾滯專征。書生孤憤思長劍。一洗秋江萬里清。

冒昌愈十八首

愈昌字伯麀。如皋人。諸生。有綠蕉館、珠泉、倦游、鑾江、支提、觀海、玉蓮、邗水、長春園、北里、句曲、靈鷲、虎阜、悼亡、淮南、飛英、半塘、北山、皖城、平湖、幽居等集。

列朝詩集。伯麀有時名。負氣伉直。爲怨家所中。浪跡避地。徧遊吳楚間。作詩敏捷。千言不草。矯尾厲角。舌辯如懸河。所至士大夫皆畏而禮之。遊王元美、吳明卿之門。二公憐其才。每爲白其寃狀。而伯麀稱詩奉二公爲祖。嗣迄不少變。萬歷末年。抨擊七子者日衆。伯麀恪守師說。抗詞枝拄。憤楚人之訾警。至欲以身死之。此可以一笑也。

田按。伯麀懷王元美詩云。避仇來吳中。始識弇州面。華屋滿詞人。涼風張廣譙。一爲白蓮詩。擊節三致美。殷勤念別離。情見齊紈扇。懷吳明卿詩云。吳公千載人。謂我買生纜。婁水蓋初傾。邗關舟一繫。郡守不好士。載決金陵計。昭雪雖未成。感激常流涕。蓋感恩知己之言。集中五七言近體。清圓流動。不盡襲七子派也。

聞恩悅二公同諸弟子登樓雪望卻寄

跌坐心堪了。經行興不慳。同攜木上座。一望雪中山。老檜著花立。饑烏斂翼還。蕭條聊送目。意在有無間。

燕山

戎馬方多事。鯨鯢輒自驕。風颿來日本。羽檄動天朝。一鼓聞吞海。先聲報渡遼。聖躬宵旰甚。欲遣霍嫖姚。

自阜民鎮抵新壩

曙色何當啓。明燈已借光。倉皇忘櫛沐。顛倒任衣裳。菰米舟人飯。芙蓉野客裝。家園慈父在。朝夕念垂堂。

暮抵龍江關先寄李兆羲張成倩於永慶寺

挂帆來百里。日暮見金陵。中有三山客。同依六代僧。竹聲清午夢。松影護禪燈。勝地應非遠。思君轉不勝。

同秦京遊泐園作

城隅日欲落。共作名園期。洞壑積秋氣。林巒分夕姿。遠心行縱目。隨意坐題詩。卻笑穆天子。神空八極馳。

夏日雨中逢萬殊上人於伏海寺

林中堪結夏。物外一逢君。涼意行微雨。禪心指大雲。談深山茗進。坐午殿鐘聞。卻望吳門色。新詩秀可分。

無從先生約同李成白吳振之吳仲玉諸君萬松上人齋會理公方丈

爲結廬山社。相將問遠公。藍輿如栗里。清磬出花宮。禪悅齋廚供。塵緣宴坐空。食餘時送難。響答總無窮。

寄悅公義公于伏牛

數載分攜見未能。伏牛天畔望峻嶒。地鄰嵩室三花樹。老謝風流六代僧。心印悟來同面壁。言詮拋盡續傳燈。從師最上應無計。僅向空門學小乘。

移舟寒山訪趙凡夫因寄黃伯傳

高齋長是憶蕭蕭。咫尺吳門晤轉遙。未覓筇輿過木瀆。先憑蘭槳入楓橋。望中巖岫紛如畫。物外乾坤肯見招。何肉周妻緣總斷。知君近已傍僧寮。

送二如上人還山

送君孤棹早春還。柳色初回未可攀。千里寒潮連鐵甕。十年清夢落金山。鳥窺香積朝聞法。龍臥中泠晝掩關。他夜相思何處寄。碧天煙樹有無間。

晚坐

窮陰累日喜新晴。晚坐空庭對月明。百里書傳鄉夢破。十年心死世緣輕。林中仙梵神魚響。殿角微風老鶴鳴。欲問前因難可識。將從有漏學無生。

月夜同秀公從中禪寺後過山中尋君弢不值因集蓮宇禪師丈室

明月高空引興濃。秋山深處一過從。橋通曲徑穿衰柳。人到雲堂起暮鐘。几上煙雲聊寂寞。燈前笑語自從容。相尋若恨輕相失。野鶴孤蓬豈定蹤。

聞恩公修塔報恩

得句其如麗藻何。談經翻厭雨花多。年來老向長干寺。願發將修窣堵波。九品莊嚴安舍利。千層金碧映山河。遙看建業慈雲護。未及寒江一葦過。

和南屏長老憶峩眉山作

南望峩眉豈易尋。出山猶憶在山深。冰輪半浸平羌影。雪色長留五月陰。白帝城高通鳥道。青天淚落聽猿吟。亦知去住皆無著。野鶴孤雲萬里心。

贈曹比部關仲曹彭澤人

畏途宦海纒涉。隱計家山欲成。試問曹邱長者。何如彭澤先生。黔南萬里從事。天畔高樓望京。今日聊同酒伴。他時好結詩盟。

登靖海寺靈石閣寄孫孟陽玄亮兄弟

空江涵月白層層。望裏吳山入夜登。明日片帆煙水闊。眞州回首是金陵。

汪君夜過許我海棠信口占謝

何處春風著海棠。軍持無數倚紅妝。羈人枕上江南夢。纒說看花夢已忘。

訪周姬新宅

儻得新居席未溫。半通江市半江門。他時白鷓舟相過。好繫門前柳樹根。

詹景鳳五首

景鳳字東岡。休甯人。隆慶丁卯舉人。除南豐教諭。改翰林孔目。遷吏部司務。謫保甯教授。有東岡集。

書史會要。景鳳深於書學。用筆不凡。如冠冕之士。端莊可敬。狂草若有神助。變化百出。不失古法。論者謂可與祝京兆狎主。無聲詩史。東岡草書奇偉。長於墨竹。

田按東圖集字傳本。余見劉喜海收藏鈔本。云得自朱笥河家。後附東圖元覽四卷。東圖題跋云。項元忬爲人鄙吝。而所收物多有足觀者。其中贗本亦半。人從借觀。驕矜自說好不休。人或過之。本欲觀其所藏。彼固珍祕不示。意欲人先觀其詩。詩殊未解。乃亦強自說好。黨人稱之。人強與說詩稱佳。以順其意。使之悅。而乃盡發所藏。又云。項嘗謂余。今天下誰具雙眼者。王氏二美則瞎。顧氏二汝眇視者爾。唯文徵仲具雙眼。則死已久。意在欲余以雙眼稱之。余顧徐徐答曰。四海九州如此。庶走未能盡見。天下賢俊。焉能盡識天下之眼。項因言。天下具眼。惟足下與忬耳。余笑曰。卿眼自佳。走則不忍謂已。獨有雙眼。自古文人相輕。元忬之言如此。錄之以發一笑。

雪後夜飲清溪閣

日暮幽閣寒。蕭然屏塵想。雪深滅人蹤。一溪神獨往。當杯發浩歌。清韻散林莽。長結孤舟翁。終此逃名網。

丁南羽畫山水歌

世人好畫不工畫。思向人前權毫末。含毫那有好懷生。嘖嘖競將雙耳聒。丁生傲兀思離奇。登樓十日衆不知。科頭獨坐青松古。坦腹空山白日遲。興來大噉忽高踞。援筆煥赫生風雨。千里移來屋壁看。江山杳靄知何處。既似輞川陰陰夏日居。又似漢陽歷歷晴川樹。我識此圖千秋定有神。好之恨未去作畫中人。爲爾駐視停玉筯。使我形神一月不得親。吁嗟人間好手有若此。誰謂顧陸張吳一時生。便死眼中之人吾與子。

題畫

檻外攢峯何處。江天遠水冥冥。半山紅葉堆戶。一壑秋聲到庭。

聽查八十琵琶戲贈

鷓絃誰撥嘈嘈聲。動指梅花落滿庭。郎若聽時儂更奏。江流嗚咽江峯青。

桃花曲

千樹萬樹紅勝霞。樹裏青樓是妾家。下馬登樓君且醉。春風明日又飛花。

明詩紀事卷八

庚籤

于慎思三首

慎思字無妄東阿諸生有龐眉生集十六卷。

四庫總目龐眉生詩文皆有縱橫排募之氣而頗涉粗豪。

于慎行穀城山館集先生善古歌行尤好爲楚騷近體不純於唐亦不落宋至傍人口吻鱗齒教響薄不爲也。

海嶽靈秀集無妄集中望嶽吟河平論諸篇天才跌宕筆陣激躍有太白風骨。

漁洋詩話龐眉生文定公慎行之兄詩才情過文定尤工古賦。

少虛先生見過山莊

老鶴千年意冥鴻萬里心溪山紆勝賞風雨促悲吟石蘚出泉滑巖蘿吐月新何緣臺上嘯時有鳳鸞音。

山中

石古山高細路分南山閣子背西曛風來懸瀨琴皆拂霜入疏林葉半醺有夢誰能閒似鶴無心我更懶於雲林邱自愛陶弘景祇恐清時負聖君。

村居卽事

繞村夏木總千章。不似龍池老白楊。剩與村人作雷雨。神鴉社鼓鬧斜陽。

于慎言一首

慎言字無擇。慎思弟。嘉靖壬子舉人。有冲白齋存稿。

宿虎窟山寺

偶向青山訪化城。山花山鳥鎮相迎。風迴碧樹秋聲落。雨過丹巖夕照生。洞鶴依人知是主。林僧出世轉多情。茅堂夜宿忘歸去。獨倚長廊待月明。

于慎行十首

慎行字可遠。更字無垢。慎言弟。隆慶戊辰進士。選庶吉士。授編修。歷修撰。侍講。左諭德。侍讀學士。擢禮部侍郎。改吏部。拜禮部尙書。加太子少保。兼東閣大學士。入參機務。以疾廷謝。失儀。尋卒。贈太子太保。諡文定。有穀城山館文集四十二卷。詩集二十卷。

四庫總目。慎行於李攀龍爲鄉人。而不沿歷城之學。其詩典雅和平。自饒清韻。

列朝詩集。文定在史館。窮年矻矻。以讀書爲事。每進講唐史。至成敗得失之際。反覆論說。上爲悚聽。講罷。分題賦詠。不長於書。詩成。倩人書之。上問之。具以實對。上大喜。讀書貫穿經史。通曉掌故。以求爲有用之學。凡所援據。駁正。具有源委。皆可施行。謝部事居穀城山中。十有七年。網羅搜抉。蘊藉益富。甫大用而遽卒。天下惜之。公於詩文。春容宏麗。一時推大手筆。其論古樂府。

曰。唐人不爲古樂府。是知古樂府也。辭聲相雜。既無從辨。音節未會。又難於歌。故不爲爾。然不效其體。而時假其名。以達所欲出。斯摹古而託焉者乎。近世一二名家。至乃逐形模。以追遺響。則唐人所吐弃矣。余聞爲郊祀饒歌。可數十首。已而視之。頗涉兒戲。亦復不自了然。遂焚棄之。取其音節稍近者。做其一二。謂之本調。至近體歌行。如唐人所假者。不曰樂府。則詩之而已矣。夫唐人能爲而不爲。今人不能爲而遂爲之。予奈何不能爲而爲也。其論五言古詩曰。魏晉之於五言。豈非神化學之則迂矣。何者。意象空洞。樸而不敢瑣。軌塗整嚴。制而不敢騁。少則難變。多則易窮。古所謂鸚鵡語。不過數聲耳。原本性靈。極命物態。洪纖明滅。畢究精蘊。唐果無五言古詩哉。余既知其解矣。而不能舍魏晉者。取其可以藏拙。且適所便。非遂能似之也。海內賞真之士。有以吾言爲是。吾詩雖不觀可矣。公生當慶歷之世。又爲歷下之鄉人。其所論著。皆箴歷下之膏肓。對病而發藥。夫惟大雅卓爾不羣。其是之謂乎。

靜志居詩話。東阿格律和平。當正聲微茫之時。能爲是調。卽以詩高選。亦堪作相。

田按。東阿論詩。洞達古今流變。穀城山館集。音調諧暢。風風乎朱絃大雅之音。萬歷中葉以後。朝政不綱。上下隔絕。礦稅橫征。縉紳樹黨。亡國之象。已兆於斯。而公安竟陵之苦音。側調。應之道。與政通。應如桴鼓。東阿爰立。未卽登朝。遽爾凋謝。所謂人之云亡。邦國殄瘁。不獨爲詩運傷之也。

武安侯墓歌

長安城西銷客魂。故侯墓前雙石門。空梁無風蟪蛄挂。高臺不夜鼯鼠奔。行歌牧豎上隴首。守冢老兵眠樹根。道傍徒倚長歎息。千古此意誰與論。當時貴寵真無匹。勢倚青天迴白日。驂乘親陪別苑游。行香日侍齋宮直。元公鐵券大國封。都護金章新樣刻。玉鞭蹀躞內廐馬。雕盤絡繹尙方食。權相交驩亦掃門。徽

侯受酒成避席。此時意氣薄青雲。睥笑看人寵辱分。負郭園池田太尉。重城甲第霍將軍。曲閣重樓春自駐。繁絃急管日初曛。自言富貴無銷歇。爭見桑田海亦竭。未央宮前請室開。咸陽道上車塵絕。閒門行馬臥莓苔。舊館罽毼藏敗葉。只今尺土閉空原。歲歲春曦杜宇血。吁嗟嗟。世皇二寵傾朝廷。前有武定後咸甯。福過俱爲萬人指。法行再見七廟靈。人間榮悴咸可數。古來金谷與鄜塢。前車已卻後車馳。請君但看北邙土。

雙林寺歌

道傍佛宮誰者築。珠樓寶殿橫山麓。僧徒指點爲予說。此寺方成主人逐。憶昨十載氣薰天。吐納日月揮雲煙。外廷稍引三公勢。內禁親操六璽權。出入鉤陳留筦鑰。笑談甲觀走金蟬。建寺平侵貴主第。施僧直請大官錢。輸來多寶堆成塔。輦盡黃金布作田。法宮梵宇何連曼。勝地名區看不斷。墓上林園學九陵。祠前樓閣成雙觀。落成牛酒國親供。建醮香花天女獻。吁嗟此寺獨渺小。赤刀已欲盈千萬。我皇神威符世祖。距脫大奸俯地取。郭家金穴入水衡。鄧氏銅山歸少府。廬兒解玉乞街衢。宅婦懷簪隨卒虜。惟餘此寺在郊原。虹梁綺構誰爲主。蛛網空懸梵鐸風。青苔自鎖瓊琅雨。盛衰轉盼那不有。幾年翻覆看如許。君不見江陵城頭土三尺。若敖餒鬼不來食。一代賢豪此謂何。爾全首領恩亦極。

春半

臥病忽已久。閒房鳴素琴。徘徊紫芝意。惆悵青春深。芳草亂迷徑。殘花空滿林。憑軒送高鳥。馳思渺難任。

送崔亞沂博士

共作名山隱。三秋采蕨薇。甯辭今日別。祇恐故人稀。斗酒不得醉。白雲相與歸。秋來元燕度。可向海門飛。

浪迹

浪迹長安陌。修途日以難。河流誰謂廣。海水自知寒。嬾慢成惡性。婆娑取貴官。春深湖上雨。何處少漁竿。

憂旱

五月欲過猶未雨。秋苗漸槁青可憐。白日火雲但裊裊。半巖泉水空涓涓。北來流離滿道路。西望邑里疏人煙。城頭鞞鼓復不罷。勅使普天飛索錢。

題忠順夫人畫像四首

燕支山色點平蕪。描出春愁上畫圖。一曲胡笳明月夜。邊聲又度小單于。邊聲新舞柘枝辭。降得渾邪罷漢師。不道長安春色少。甘泉宮裏畫闕氏。天山獵罷雪漫漫。繡袜斜偃七寶鞍。半醉屠蘇雙頰冷。桃花一片殢春寒。蓮花寶鈿綠雲鬢。不脫襜褕款漢關。枉殺白登城下畫。虜中原自有紅顏。

諸葛元聲兩朝平攘錄。三娘子，俺荅長女，啞不害所生女也。生而骨貌清麗，實性穎異，善書番文，通達事務，蓋虜中女品之絕代者。筭時已受襖兒都司聘，俺荅先通焉。未幾生子，遂奪取之。俺荅寵甚，事無巨細，咸聽取裁。隆慶五年，初封忠順夫人。萬曆壬午，俺荅殂，長子興克都隆合黃台吉襲封順義王，復欲蒸三娘子而配之。三娘子嫌其貌陋，拒之。率衆遠遁。黃酋引部落追之。此時正當互市踰期，虜使不至，鎮巡疑有背盟。後半月，三娘子已就黃酋，夷使忽來完市事，鎮巡宰牲謝天焉。黃酋襲封僅四年，三娘子佐之貢市，惟謹。萬曆十四年，黃酋殂，長子扯力良襲封。復蒸三娘子而配之。其寵幸無異。二酋十五年六月，扯力良同三娘子擁衆十餘萬騎入邊，云有馬八千疋，要朝廷用價買之。卽退時，值浹旬雨不止，邊牆多圯，巡撫鄭洛甚以爲憂，惟好言諭虜使，且令人傳語三娘子，無忘香火舊情。七月，虜卒聽平三娘子之力也。萬曆二十年，宣鎮史車二酋叛盟入犯，時邊久無警，聞變錯愕，撫臺以中領軍常鶴貌偉才雄，舉之使虜，覘動靜，常挺身入虜營，讓虜王扯力良與三娘子，極言中國嘉慶三世嚮化，歲頒豐賞，今二酋阻壞世好，大不利，今非俘二酋獻闕下，必不能復徵太師恩矣。虜偉中軍狀貌，聞其言心動，卽擒二酋，仍召熟夷以安獨石。中軍素善繪，因密圖三娘子及受封三王各像，爲圖說以獻於朝，故備得其詳如此。

田按：馮北海琦亦有題三娘子畫像詩云：豔旣春煖瑣芙蓉，爭羨胡姬拜漢封。繞膝錦纏珠勒馬，當胸寶練盤龍塞。北佳人亦自饒，白頭胡舞爲誰嬌。青霜已盡邊城草，一片梨花冷不銷。紅妝一隊陰山下，亂點駝酥醉朔野。塞外爭傳娘子軍，邊頭不牧烏孫馬。又徐文長邊詞云：女郎那復取梟英，此是胡王女外甥。帳底琵琶推第一，更誰紅頰倚蘆笙。老胡龍向一人多，窄袖銀貂茜叵羅。遞與遼東黃鸝子，側將雲鬢打天鵝。汗血生駒撒手馳，況能粧態學南閩。鉢將卓帕穿風去，愛綴銀花綽雪飛。姑姑花帽細銀披，兩鬢腮梨灑練椎。箇箇菱花不離手，時時站馬上胭脂。

公鼎十五首

鼎，字孝與，蒙陰人。萬曆辛丑進士，改庶吉士，授編修。歷諭德、左庶子、祭酒、詹事，遷禮部侍郎，以薦

李三才落職閒住崇禎初復官謚文介有問次齋集三十一卷

澗園集周庭詩氣質渾渾不見雕刻而度自全

李若訥四品稿孝與諸體咸妙不屑屑摹古亦不沾沾足今所得趣者尤在晚年山居諸什

趙秉忠嶼山集孝與詩博大宏敞無湫隘之態

池北偶談吾鄉公文介公萬歷中爲詞林宿望詩文淹雅絕句尤工

靜志居詩話言詩於萬歷則三齊之彥吾必以公文介爲巨擘焉卽其論詩大旨云風雅之後有樂府如唐詩之有詞曲聲聽之變有所必趨情詞之遷有所必至古樂之不可復久矣後人之不能漢魏猶漢魏之不能風雅勢使然也如漢朱翁翁離之作魏晉諸臣擬之以鳴其一代之專易名別調當極其長豈以古今同異爲病哉後世文士如李太白則沿其目而革其詞杜子美白樂天之倫則創爲意而不襲其目皆卓然作者後世有述焉近乃有擬古樂府者遂顧以擬名其說但取漢魏所傳之詞句模而字合之中間豈無陶陰之誤夏五之脫悉所不較或假借以附益或因文而增損踟躕牀屋之下探赜騰僿之間乃藝林之根蠹學人之路阱矣以此語於作者之門不亦愿乎夫才有長短學有通塞取古今之人一一強同則千里之謬不容秋毫肖貌之形難爲觀面若曰樂府則樂府矣盡人而能爲樂府也若曰必此爲古樂府使與古人同曹而竝奏之其何以自容哉李于鱗曰擬議以成其變化噫擬議將以變化也不能變化而擬議奚恥焉又云律詩出於古詩而難於古詩七言後於五言而難於五言故七律於諸體中最不易工古今長技惟杜氏耳杜氏之長則秋興懷古諸將數篇而已近世擬作甚多大率淺率牽合觀者厭焉又贈邢子愿長歌云爲君歷代選宗工前稱弘正後嘉隆北地雄渾真大雅步趨盡出少陵下汝南俊逸誠天然邊幅姿態未全捐濟南匠心奇且麗藻績無乃傷辭意武昌才美謝諸君節制之師獨出羣東吳囊括靡不利鈍未能免人口大抵明興只數家瑜者從來不掩瑕餘子紛紛未易說擬議原非吾所悅丈夫樹立自有真何爲效彼西家輩

蓋力攻擊擬之非。然觀其七律。仍以歷下爲宗。故有文章一代李滄溟之句。同時名家者。馮用韞。于念東。王季木。皆拔萃者也。田按。漁洋稱文介七絕。誠爲玄賞。文介心折于鱗。而能砥礪擬議之失。與齊人但知管晏者殊科。惟才力頗弱。長篇殊鮮。合作善於持論。而短於自運。明人中若陳約之。王敬美輩皆然。不獨文介也。萬歷時三齊作家。吾斷以高孩之爲首選。文介諸人皆在下風。

莫愁樂

莫愁在何處。莫愁石城陰。長槳劃江水。難斷莫愁心。

遠別離擬李太白

遠別離。吾有握髮之故人。乃在桑乾之南。易水之北。當年相期釣桑泉。今日淹留在京國。山蒼蒼兮雲茫茫。道路阻絕兮塵沙塞。歸雁不能銜我之遙思。風入帷兮霜凝席。膠結之心如轉石。摩頂至踵復何言。覆瀋餘瀝甯堪惜。世言一乘車。一戴笠。升沈轉瞬非疇昔。墜羽飛絮偶相值。明月皎皎澄波流。照我素心中。懷憂重重煙霧蔽。不隔清光之悠悠。還君綺琴解寶劍。仰看別鶴淚如霰。

歷下訪白雪樓

西望高樓雪正深。浮雲天外一登臨。巖松荒壠成陳迹。秋菊寒泉自賞音。溟海煙霞增蜃氣。鏡湖風雨有龍吟。千秋大雅誰同作。虛負當年御李心。

都下送濟南黃參軍之古北。參軍舊在征南幕府。

濟上公衡快士流。壯年投筆事戎輜。漁陽老將推鋒日。蠻府參軍草檄秋。塞上黃雲看躍馬。都門青柳送鳴騶。棄繻我愧終童意。目斷伊吾瀚海頭。

春日送客

城南宿雨漲河橋。千里襟期付一朝。春去看春如夢隔。客中送客幾魂銷。白蘋洲渺愁難駐。綠樹煙迷恨已遙。從此去程應計日。浮雲天盡轉無聊。

薊州獨樂閣

上方鐘磬徹雲霄。閣額題書是舊遼。人代興亡經百戰。胡塵淪沒歷三朝。幽情卽事成悲感。絕塞逢春轉寂寥。堪笑此行何所見。寒陵片石亦蕭條。

春雪後卽徙村居

雪滿青松碧玉交。流澌初漲帶冰消。比鄰鵝鴨猶迷徑。隔樹烏鴉巧護巢。歸計倘如彭澤宰。卜居擬近孟城坳。深巖亦是同人地。莫訝離羣去遠郊。

宮詞

驪山太乙列車徒。萬騎千營夜不呼。傳語侍臣休諫獵。君王明日大夸胡。

邊曲二首

八月遼陽雪影寒。孤城吹角淚闌干。一時鴻雁南飛急。無數征人駐馬看。
隴水離離下隴頭。平沙西望接涼州。塞鴻淒斷胡笳起。不是征人亦淚流。
秋日再遊城南池亭遇雨止宿

韋曲看花春可憐。重來疏柳帶秋煙。無聊更聽南樓雨。一枕疏燈意黯然。
送于泰寰侍御歸濟南

春明解袂是齊州。易水瀟瀟似隴頭。歸路不須頻北望。煙波滿目不堪愁。
鄱湖南際是洪信。江水交入處

湖水澄清江水渾。平沙隔斷數漁村。長風吹雨連波長。兩岸青楓任吐吞。
襄陽

江上輕帆落浴鳧。鏡中倒影數峯孤。林鶯送客巖花笑。曾見銅鞮歌舞無。
關谿望金華山水

百折銅江繞釣臺。四明雲起接天台。半空突出冰輪湧。定是龍湫雁宕開。

公鼐六首

鼐字敬輿。鼐弟萬歷丁酉舉人。官工部主事。有小東園詩集。

田按敬輿詩長於近體與乃兄風格略似。

辛卯紀事

廟議安邦略。猶聞馬市升。豈能容再誤。何必待來年。狼子戒心狡。狐疑漢策偏。帝閭真虎豹。無路說憂天。

秋日閒居

十畝爲園萬樹重。前山秀出數芙蓉。村邊茅屋連紅葉。樓外寒泉挂碧松。欲向赤城尋採藥。豈知長樂好聞鐘。林間猿鶴休相妬。占得溪南第幾峯。

寄李季重進士

五噫歌成出漢關。喜從今日謝塵寰。情隨驛路牽愁去。春放楊花伴客還。交態與君期皓首。故人獨我戀青山。心知有約應相待。爲訪千巖萬壑間。

送周野王南遊

萬樓垂楊拂畫橋。春風何處聽吹簫。江從北固分三楚。人到西陵憶六朝。竹箭發時逢社燕。蘭舟歸去看江湖。與君共有千秋約。莫待淮南桂樹招。

直中書有感

曉徘徊闔近星辰。暮惹爐煙下紫宸。玉璽不開時有詔。金甌常覆爲何人。當階紅藥空搖影。隔舍青山好

作鄰黃閣畫封鷺侶散。花磚生草案生塵。

送翁完虛奉常使德藩兼懷舊遊

七十峯頭七十泉。夜來飛夢落齊川。偶聞上客驅車去。欲伴名山借榻眠。周禮至今猶在魯。酒徒好憶再遊燕。國人耳目皆相屬。莫爲清時懶著鞭。

董嗣成二首

嗣成字伯念。烏程人。尙書份孫。萬歷庚辰進士。除禮部主事。歷員外郎中。建言削籍。有青棠集八卷。

田按。伯念乃溇陽尙書孫。溇陽以圓融取容。伯念疏救李獻可削籍。抗直不阿。可稱幹蠱。

寶應道中

去國日幾許。栖遲水一涯。人家半蘆荻。市稅盡魚蝦。邑里孤煙斷。村墟落日斜。蒼茫何處所。鷗鳥下平沙。

送周山人還吳

南國嗟昏墊。擔囊殊可憐。客程雙屐雨。歸計五湖煙。雲臥燒丹竈。花深種秫田。憂時有方伎。辛苦向人傳。

董斯張八首

斯張字遐周。嗣成弟。國子監生。有靜獻齋集十四卷。

靜志居詩話。遐周初學詩於周廣業。及入闈。心折曹能始。歸與吳允兆。王亦房。酬和。是時公安。竟陵派盛行。浙西風氣不盡移。易。遐周洽聞周見。與吾郡沈景倩畧同。詩亦相似。嘗以所作投前守吳季騫。季騫寓書韓求仲云。在郡兩年。不識有董生。吳與守眼可抉也。近得渠見贈詩。如飛天仙人。不著一煙火字。其傾倒如是。

田按。遐周童牙。留篋二稿。骨格尙未老蒼。寒竽一集。自謂一變。冥心苦搆。心血欲嘔。頗參宋派。嘗自寫集三本。一置西禪寺。一度笥中。一假好事傳觀。自負亦不淺矣。

數得閱康侯所假書忻然有寄廿六韻

秋暑苦灼人。簟息不曾帽。竹樹都欲然。快雨適相勞。遽看市塵洗。轉欣田黍膏。倦呼丹邱芽。詎羨蓴絲苈。好音頃西來。字字慰幽蹈。蘭絨粲然啓。珍于鼎納郤。卮言雜俳諧。莊語儼墳誥。玄搜則抽繭。迅步乃飛瀑。我硯蕪不治。舊聞猶滅竈。俗諱三鱣講。家愁五特耗。借書竟何門。賃作非所懊。學海擬杭之。溟滓歎誰導。愍余藿食者。忽有弦商犒。味如投釀均。心無入宮媚。朝醒獲柘漿。一讀起聾眊。末光良不遺。瓊華絕稱報。吾兄宿讀流。藝場建雄纛。神穎標綺年。殖學壓耆耄。小宋殊磊磊。小阮仍浩浩。架籤時互掣。弦軫必齊操。相賞松石間。微言輒窮奧。蘭叢芳屢振。玉積輝彌到。析疑曠縣疾。卜宅銘余好。富貴易曲肱。久識靜君躁。山栖君昔詠。水樂余非傲。深有靈嶽期。汝領恥空告。

玄宰先生寄示古觚卣二種。問余所藏黃文節。趙文敏書。先生不甚喜兩家書。茲豈其戲耶。寄此博笑。

方厭歸蘇葉翠若黛初埽。卣銘數十字。古籀讀徐了。遠從雲間落。盥手撫清曉。精光照茆屋。置我周秦宮。遙知舊陵墓。野露泣榛草。生來古癖深。藏帖殊恨少。吳興行茂密。雙井勢天矯。來經天籟閣。墨彩尙鮮好。君言欲得之。博以兩奇寶。假許璧可輕。易馬石能討。君書薄虞褚。茲語似相黜。二老見君書。流涕故應早。厭肉而求蔬。貧士不得飽。有如故人聚。將別心更懷。獲奪吾豈敢。開眼爲君道。法書與奇玩。沈溺盡煩惱。終爲誰氏物。聚散一飛鳥。貞心不重嫁。古貌足娛老。珍惜故名癡。買遷亦成擾。何如任其常。疆里請自保。

夏日同周虞卿集華濟之齋中

公子善留客。清尊開竹軒。桑陰閒入牖。水氣暗浮村。散坐同知己。無聊或放言。持杯有深意。落日滿高原。

暮秋同長文夜集恣公精舍得衣字

竹庵立窮渚。鄰社往還稀。偶伴野人至。坐聽秋葉飛。僧厨餘午鉢。佛火近寒衣。妙理從師悟。猶憐帶月歸。

落日

落日汀洲靜。高天轉沆寥。煙橫沙岸白。波急遠山搖。野水倚孤棹。前村歸暮樵。清歌何處起。無數荻花飄。

送范東生遊滇

荆吳雙眼盡。復發滇南撓。遊道轉之僻。遠心誰可招。波危惟度鳥。山立但通樵。定有異聞積。經年歸不遙。

題李長蘅畫二首

層嶂倒如楓赤。茂林翻寫螺青。卻憶廿年前事。武夷道上曾經。
花任天風吹老。鳥從日暮忘還。碧潭寸寸秋色。何妨置我其間。

梅鼎祚十五首

鼎祚字禹金宣城人國子監生有鹿裘石室集六十五卷。

四庫總目鼎祚輯八代詩乘又輯古樂苑於詩家正變源流不爲不審而所作止此則囿於風氣委曲諧俗之過也。
歐大任虞部集禹金五言古蒼然骨立七言馳驟樂府時極少陵之致近體其氣完其聲鏗以平其思麗以雅蓋彬彬中宮商也。

王寅十岳山人集禹金選律具才風格恪守奇宕時作乖僻不生。

列朝詩集禹金於學博而不精其爲詩宗法李何雖游獵漢魏三唐終不出近代風調七言今體步趨李于鱗又其靡也禹金好聚書嘗與焦弱侯馮開之暨虞山趙玄度訂約搜訪期三年一會於金陵各出其所得異書互相讐寫事雖未就其志尙可
以千古矣。

明詔林禹金篤志纂輯嘗納妾鄒氏一月不出人怪暱問之則已輯青泥蓮花記十二卷。

梅清梅氏詩畧禹金著作充棟有鹿裘石室集歷朝文紀古樂府苑八代詩乘書記洞隱唐樂苑青泥蓮花記才鬼記才幻記才神記女士集嘯嘯臚志李杜詩鈔宣乘翼玉合記長命縷崑崙傳奇諸書行於世。

靜志居詩話禹金周見洽聞著書甚富詩乘文紀之外旁及書記小說兼精傳奇所填轉韻平玉合記爲詞家所賞有云風中
絮陌上塵歎韶光何曾戀人亡友王介人極稱之。

田按禹金五言長於近體。七言長於絕句。名列兪州四十子之一。兪州晚年學仙。奉壘楊子教。謂昇舉可致。禹金有兪山園遺憶。王長公詩云。眼前感激千古事。白雞夢斷青鸞逝。服藥求仙徒誤人。縱酒高歌差快意。可謂達人之論矣。

江上宿觀音巖

江眺極蒼茫。雲居信縹緲。日沒衆巖空。天長片帆杳。靜夜縕霜嚴。澄波銜月小。鳴榔跳潛魚。危巢跼栖鳥。濤響雜寒松。露華流翠篠。一燈照世迷。孤磬出林杪。獨宿伴疏星。高歌命嘉醪。清徹不成眠。海暎映秋曉。

秋夜寄叔箕

天末涼風起。因之一問君。佳期夢宿昔。長往謝人羣。月魄生殘夜。河流界白雲。悲秋吾欲賦。搖落不堪聞。

溪上同李山人步月

偶乘流水往。似與碧雲期。爲興吾不淺。有懷君自知。青林含月動。白幘受風欹。共卜雙谿釣。高天見一絲。

都夜聞笛

長安聞玉笛。楚客遠遊時。明月一爲奏。秋雲不可持。江空龍語細。天闊雁行遲。萬戶秦淮柳。寒條綠自垂。

楊姬館逢卓懋德北上

以君一日長。別我十年餘。桃葉愁中檝。梅花病後書。寸心從髮短。孤夢隔秋疏。莫戀當壚者。君王問子虛。

夜過寒山寺覓藤梅

雜興

夜半鍾初罷。寒山路漸通。人投漁市火。舟倚野橋楓。僧語蒙霜出。茶煙帶月籠。藤梅何嫋嫋。香氣曉隨風。
天授雄才漢武皇。誇胡羽獵校長楊。自班倩女金條脫。別號將軍鐵桶襠。北狩鑾輿迴朔氣。南巡花月扈春陽。先朝帝澤原優渥。萬歲千秋樂未央。

姑孰留寄史仲弢司理

斜日孤城水上浮。浪遊誰問孝廉舟。南來碧樹初搖落。北向滄江正穩流。客裏夜懷姑孰雨。望中雲色秣陵秋。前程一倍思君處。獨醉西風太白樓。

頓姬坐追談正德南巡事姬之先有優頓仁擅琵琶及角妓王寶奴俱見幸

武帝時巡逼舊京。主謳鉤弋並蒙榮。更衣別置官楊繞。蹴鞠新塲御草平。徧選檀槽催鳳拍。忽傳金彈逐鶯聲。寶奴老去優仁遠。坊曲今誰記姓名。

夜雨

孤懷夢裏三更雨。雙鬢愁來一日秋。卻笑寒燈解相識。照人疏影到西樓。

贈別

遠山雙黛寫新蛾。銀燭金樽碧玉歌。愁逐東風渡江去。楊花無定奈春何。

塞上曲

千金散盡少年場。走馬呼鷹氣莫當。白晝殺人都市裏。脫身新拜羽林郎。

板橋道中

細雨濃愁斷送春。板橋新綠長溪蘋。搖搖似出新林浦。滿地楊花亂撲人。

寄陳德基戶曹薊州

燕都酒樓高插天。高髻胡姬慣數錢。忽聽琵琶歌出塞。漁陽清淚落君前。

揚州見王驚鴻

趙女燕姬枉得名。胡笳羌管盡邊聲。廣陵一曲千條柳。望到江南便有情。

梅蕃祚二首

蕃祚字子馬。鼎祚從弟。官滋陽縣丞。有主簿稿。涉江草。王程草。

梅氏詩畧。子馬性豪邁。任俠。傾動士林。弇州贈詩云。船底歌聲牛渚月。篋中詩草敬亭霞。可想見其風概。靜志居詩話。子馬與季豹。禹金同負詩名。王元美詩。較他輩從更高華。蓋指子馬言也。

同錫子泰符少虛遊三天寺

窈窕青松逕。逶迤白石關。殘春同客到。落日見僧還。坐聽齋時磬。經行雨後山。前朝留片碣。磨洗盡苔斑。

送泰符之金陵兼寄諸子

葉落蕭蕭秋正深。行人匹馬發新林。叮嚀莫過投書渚。一紙從來抵萬金。

梅國祚一首

國祚字景靈。宣城人。歲貢生。除杞縣教諭。遷綿竹知縣。有景靈全集。

答禹金見寄

孤城風雨後。二月豔陽初。別爾非千里。愁余是尺書。貧憐生計拙。狂覺世情疏。見說春遊徧。能無憶鹿車。

梅嘉祚一首

嘉祚字錫余。國祚弟。諸生。有默奇生遺稿。

送時甫叔判蜀州

送別之官去。三山嶺上遊。亂雲橫劍閣。明月夢刀州。檄自平蠻草。江仍學字流。茂陵遺記在。好爲漢庭求。

梅台祚一首

台祚字泰符。國祚弟。有弧矢集。

泊潯陽

獨夜空江思寂寥。聞歌一半楚人謠。故鄉自是無消息。只道潯陽不上潮。

梅鷓祚一首

鷓祚字仲舉宣城人萬歷癸未進士選庶吉士改監察御史

寄禹金兼東殷無美

客久問歸期。淒然有所思。雞林文字貴。鳥道尺書遲。白雪從誰和。青萍轉自疑。倦遊無可托。回首暮雲時。

王象艮三首

象艮字伯石一字思止山東新城人貢生官姚安同知有迂園集二十四卷

山左明詩鈔公孝與云思止容淹雅白真草澹自然神合

居易錄郡丞詩名出考功下然謹守唐人矩矱不失尺寸如孤城一飛矢六國有心人南雁迎花早東風帶雪多龍源花外水鹿角雨中山皆五言之選

魯仲連射書處

詎忍蹈東海。誰思強帝秦。孤城一飛矢。六國有心人。俠氣海山冷。古墳湖水新。甯論五霸業。那減擲輕塵。

暮秋

滿院秋光帶晚霜。人同寒雁立斜陽。年華老大無風味。世事喧爭總劇場。庭葉掃除旋自落。籬花開盡尙餘香。迂園三徑蕭條後。柯柏亭亭色轉蒼。

湖上食鱸葍作

縱酒逃名把釣竿。宦情世態等閒看。西風乍返江東棹。只此蓴鱸合去官。

王象明一首

象明原名象履。字用晦。象良弟。貢生。官大甯知縣。有鶴隱集。

闕題

日日輕雷送雨聲。小窗歷亂竹枝橫。水痕時落還時漲。枕上看山秋欲生。

陳价夫二首

价夫字伯孺。閩人。有招隱樓稿。吳越游草。

列朝詩集。伯孺少爲諸生。躋省門不見收。隱居賦詩自娛。阮自華贈詩云。伯孺佳公子。簞瓢居陋巷。短衣纒及脣。吾視天夢夢。

淘江津亭送徐七歸冶城

留君不可挽。臨水送將歸。百里未爲遠。所嗟良會稀。悠悠春江上。望望孤帆飛。相思那可道。佇立空斜暉。

夜渡瓊海

五兩斜飛不暫停。長鯨吹浪晚冥冥。虛疑漢使求靈藥。漫指仙槎動客星。鄉國每勞瞻北極。風雲今始識南溟。晨潮漸滿扶桑白。一片瓊山鳥外青。

陳薦夫一首

薦夫名藻以字行。改字幼孺。价夫弟。萬歷甲午舉人。有水明樓集十四卷。

田按伯孺幼孺兄弟稱詩品略相似。徐惟和晉安風雅有幼孺序云。非性靈不談。脫釘鉅如屣。知其風旨所在矣。

臨別再呈伯孺兄

臨別無言但損神。孤身遊子白頭親。鄉書到處封題便。馬上相逢好奇人。

黃維棟一首

維棟字上仲。黃巖人。

以詩代柬鳳凰山人

千峯秀色白雲間。遙望高蹤何處攀。書問未達鴻雁侶。夢遊祇到鳳凰山。遲回歲月愁中鬢。荏苒風塵別後顏。便欲拂衣長往也。與君同掩綠蘿關。

黃維楫一首

維楫字說仲。維棟弟。

列朝詩集說仲詩清拔。

夜思

草色煙光向晚淒。望鄉人自滯淮西。風傳鼓角更初轉。霜落關河斗漸低。夢欲成時逢雁過。愁方生處有

烏嘸家書倉卒真難達。不是秋來醉懶題。

劉胤昌一首

胤昌字燕及。桐城人。萬歷甲辰進士。除宜黃知縣。改臨川。降廣東按察司照磨。遷廣濟知縣。徵授南大理評事。出爲興化知府。有遷草遊草覲草。

滕陽覽古

子房素心人。弱志無雄才。一逢黃石公。殺機從此開。功成不受賞。辟穀何爲哉。帝圖旣已矣。神仙骨亦灰。

劉胤芳四首

胤芳字未洙。胤昌弟。萬歷中諸生。有次醉齋稿。

徐璣桐齋集未洙著詩經永論其自序曰在心爲志發言爲詩觸物發聲天機自動然物有恆姿而思無定檢或率爾造極或精思愈疏有淺言之者深解之而索然篇什之外吟咏有餘字句之間尋求彌遠此言盡說詩三昧卽論漢唐以來之詩亦可括其宗旨。

詠史

相如罷車騎。高臥秋風時。門掩茂陵草。夢繞上林枝。寂寞竟何似。歲月忽已馳。賴有長門賦。能充貫酒資。

懷方嘉州潛夫

之子三刀夢。嘉陵萬里行。雲過神女廟。花入錦官城。杜宇千林合。峨眉片月明。此時端手板。從事恰相迎。

寄謝中隱靈泉蘭若

山人不作塵中戀。布褐春隨開士居。半榻香雲初地接。六時清夢世緣疏。當杯濁酒客乘興。照眼濃花好著書。老我別來蕭索甚。高齋夢蝶正蘧蘧。

別文姬

潮來湖畔水痕平。不分通州送遠行。爲道相思似潮水。有時纔退復還生。

郭天親一首

天親字聖胎。莆田人。萬歷中國子監生。

露書郭聖胎長安詩。如遠客逢故人。言皆肝膈。

連雲閣

柴門連翠微。幽人自高閣。不知何處雲。片片當窗落。

郭天中一首

天中字聖僕。天親弟。

露書聖僕詩。如秋柳蟬聲。聽者竦耳。而惜其稀。

列朝詩集。聖僕祖以避寇徙秣陵。母誕聖僕時。夢一道人雙髻曳杖。從山巔下。直入其室。其生也。頂髮截分。以徵異焉。聖僕以五日生。早失父。性至孝。孤情絕。迺出流俗。購畜古法書名畫。不事生產。專精篆隸之學。窮厓斷碑。搜訪撫。閉戶冥搜。寢食

都廢。晚年隸書益進。師法秦漢。最爲逼古。母沒。權厝於城東郊。傲居其側。風雨蕭然。終不肯去。人欲爲卜居。以僻耽山水爲辭。竟不欲明言。廬墓以市名也。故人秦和楊嘉祥守維揚。延致聖僕。贈遺數千金。斥以買歌姬數人。購書畫古物。并散給諸貧交。緣手而盡。嘉祥歎曰。此吾所以友聖僕也。諸姬中有朱玉耶。工山水。師董北苑。李桺那。工水仙。直逼趙子固。疏窗棊几。菜羹蔬食。談諧旣暢。出二姬清歌以娛客。或邀高人程孟陽輩。流覽點染。指授筆法。鍾伯敬贈詩曰。姬妾道人侶。敦彝貧士家。亦實緣也。

石鼓詩

鼓非石。實者星。文非鼓。勒者銘。焚外書。刪外經。經雅頌。書典型。隸秦漢。徑睽庭。篆龍鳥。藍洩青。白謝杵。春蠶停。嵌辭金。波畫零。我拜手。神之聽。

華善繼一首

善繼字孟達。無錫人。嘉靖中貢生。除浙江布政司都事。遷永昌通判。有折腰漫草。

靜志居詩話孟達詩不及其弟。

與僚友集張家園

名園城市裏。頗有習家風。池映孤亭動。橋分小洞通。折花驚暮蜨。移石走秋蟲。事事皆成賞。清尊亦自空。

華善述一首

善述字仲達。善繼弟。有被褐先生稿十七卷。

靜志居詩話仲達與兄孟達並有才名。王元美列其兄於四十子之列。而仲達不與焉。觀其詩品。矜奇灑落。幾欲御風而行。

時詞客未或過之。而元美序之。謂不可爲典要。是亦拘牽之論已。

贈顧南邗先生

南邗先生家近市。終年強半龍山裏。招尋盡是素心人。飢卽探薇渴飲水。三祖流傳焦尾琴。當時得之千金。錦囊往往共出入。清風明月爲知音。自言指法有神授。中郎中散相先後。一調九龍峯欲飛。一鼓二泉泉爲溜。過客求聽無所惜。樵童牧豎任爭席。松枝拂拂梅花飄。澗魚喁喁巖鳥默。亦知伯牙君後身。世鮮鍾期誰識真。賢從癡絕好我琴。我琴無弦但蒙塵。今願託居煙蘿下。流水高山秋復春。

盧純忠一首

純忠字子孝。南通州人。有潛菴詩錄。

溪村

門巷沈沈草徑迂。綠楊深護野人居。水聲不斷日停午。時有溪童來捕魚。

盧純學一首

純學存子明。純忠弟。有食翠館山中二集。

田按。談書畫者。有鑒賞家。有收藏家。鑒賞者。能自鑒別評定高下。錄眞品而去贗品。舍凡品而求精品。收藏者。好事而眞質。錯出。佳惡悉收也。選詩者亦然。子明於詩事不甚了了。所作不能過人。而頗好事。輯明詩正聲至六十卷。亦收藏家之流也。

病中書訊王承父

秋去翻成病。支離懶出山。思君明月下。伏枕白雲間。落葉孤亭寂。秋花片石閒。牀頭有流水。愁絕對潺湲。

宿鳳翥四首

鳳翥字孟威。掖人有尙白齋詩。

瀟音集。西樵曰。樊桐五古專摹建安以上。似不屑晉宋近體。亦臻老格。貽上曰。樊桐與甯之力追正始。選體沈古。邁邁原本河梁。雜以樂府。七言雄鬱。意得處直逼少陵。

田按。孟威與孫甯之倡和。趨法畧同。古體不及甯之。

秋野

病起惟尊酒。愁吟獨野行。海浮萊子國。山接不其城。序晚羣芳落。天清旅雁鳴。亂山雲霧裏。的的斷霞明。

遙和大澤山詩

遙聞清絕地。幽致隔凡蹤。夕翠橫千嶂。晴風吟萬松。疏林行野鹿。落日響山鐘。那得協心賞。排雲躡碧峯。

春園漫興

層臺延眺起清筩。曲曲長林巧映沙。黃鳥狎驪全放柳。遊蜂偏惹未殘花。城頭日落春溪轉。河上風輕燕子斜。暮笛一尊芳草外。不知何處有仙家。

漫成

石橋流水水西頭。懶性祇今拚一邱。十畝桑麻開別墅。一尊風雨對平疇。人從七夕逢初霽。雁向橫塘度早秋。中散自來耽酒德。醉鄉吾亦擬同遊。

宿鳳起一首

鳳起字沖之。鳳翥弟。有清虛館詩。

西園雜述

頗愛山居好。疏狂常不冠。鶯囀覺晝永。花落識春殘。竹外尋棋局。沙頭理釣竿。升沈事已矣。雲臥獨加餐。

喻應夔一首

應夔字宣仲。新建人。副使均子。以明經官興山知縣。有虹玉樓詩十卷。

饒齋詩話。新建喻宣仲遊金陵。與曹能始同賦六朝懷古詩。中有晴天鬼火燒枯樹。秋水漁燈照廢宮。盛傳於時。其詠虛陵金牛寺。落句云。誰言流水去。長在寺門前。蕭伯玉。劉晉卿諸公。嗟賞閣筆。李梅公先生爲余言之。

送曹能始入桂林

桂林雖簡僻。詞客頗相宜。賞眺情初遠。輜軒去莫遲。官閒對奇岫。句冷得新詩。遙想同聲在。分題競爽時。

喻應益一首

應益字叔虞。應夔弟。

懷曹能始

海內論巖壑。奇觀獨桂林。不因山水興。能動宦遊心。久報前驅度。何時使節臨。鬱孤臺畔客。吟望到於今。

明詩紀事卷九

庚籤

鄭學醇一首

學醇字承孟廣州順德人隆慶丁卯舉人官武緣知縣有句漏集

廣東詩粹張羽王云武緣詩其氣溫其思密其辭俊以麗

贈隱者詩

東林富麋鹿下有靜者廬垂蘿蔭檐隙落葉紛前除黔婁時曳踵玄晏恆著書何必方外逃始與塵事疏

梁紹震一首

紹震字原東廣州順德人隆慶丁卯舉人官平樂同知有緒昌堂集

元日

風高千戶曉雲靜九天開把酒聊隨俗占年一上臺野梅催歲色檐鳥喚春來坐看江潭父得魚吹笛回

黃鳳翔六首

鳳翔字鳴周。晉江人。隆慶戊辰第二人及第。授編修。進修撰。歷中允。諭德。進祭酒。擢禮部侍郎。疏建儲不報。乞休歸。起故官。改吏部。遷南禮部尚書。天啓初。諡文簡。有田亭草。

田按文簡立朝。不附和江陵。又疏建儲不報。乞歸。有恬退之風。五言詩清警拔俗。稱其爲人。

謁于少保祠

白登園不解。六飛去不返。社稷幸有君。臣節惟蹇蹇。九鼎奠如山。邊塵淨若捲。漢皇有神靈。肅然乾樞轉。安得延陵讓。用竟呂甥款。南宮蟄龍奮。自恨一死晚。蒼穹驟黓黓。旁觀爲涕泣。嗣皇賜昭雪。廟貌寄崇巖。臣忠主亦聖。遺風百世遠。

鄭方坤全閩詩話。黃公鳳翔異夢記云。萬曆己丑冬至前二日。余以叨貳春省。將祇事郊壇。齋宿署中。是夜。與僚長東阿子公。富順李公擁榻玄談。宵分乃罷。既就枕。忽夢有投刺者。曰。于尙書使也。開函。睇視弗覩名姓。刺中有二語云。空山一淚憑誰寄。萬古孤雲祇自愁。心自駭愕。通夕不寐。晨起。具述以告二公。于公訝曰。所謂于尙書者。非眼中人耶。少選。浙江上奏。豫來呈副。封則巡撫傅某所題疏也。略曰。伏觀故少保兵部尙書臣于謙。當睿皇北狩。景帝嗣統。內修外攘。盡瘁竭誠。俾九鼎危而獲安。鑿轍去而復返。忠甚盛也。遭萋菲之讒。竟死非辜。睿皇旋覆。悔之。聖聖相承。先後昭雪。贈官賜諡。建祠吳山。恩華備矣。惟時秉事者弗克將順德意。易名蕭愍。未愜衆心。乞聖明裁改。以彰顯勳。慰幽魂。于公覽疏。顧謂予曰。夢徵矣。幽明感通。一至是乎。顧少保公獨見夢於公。何也。蓋予嘗陟吳山之陽。謁少保祠。爲詩弔焉。良謂有一面之識。乃爲二公誦予詩。有主聖臣忠語。于公嘆曰。公爲少保公知己矣。比疏下。于公請改諡曰忠肅。天子俞之。於是輿論稱愜。謂足安少保公九京云。

山中寒食

介推不言祿。遠作龍蛇蟄。山林雖被焚。一去周八極。此身豈匏繫。死向灰中匿。太原人何癡。千載悲寒食。聽月樓示玄道人

西來音可觀。層樓月可聽。耳目非易用。靈根洞相應。受想屬虛空。萬緣寂俱定。黜聰是聞法。收視乃見性。窈窕樓中居。日覺丹臺淨。六鑿爾都捐。無得亦無証。何用強分解。曉曉問佛姓。

思舊吟二首

瑕邱夙傳業。摛詞亦擅名。譚諧似方朔。而不登漢廷。家無種秫田。當墟買宿醒。吟社時酣唱。刻燭四韻成。何煩手推敲。一座爲盡傾。壯懷老偏豪。隕矣處士星。江山人一鯉

早歲曾夢筆。藝苑知名久。一自結同聲。視我忘年友。宦遊咏宣城。退居吟五柳。側耳何鏗鏘。寄贈亦瓊玖。蘭亭有唱和。魁然爲祭酒。郢匠當我前。掘工宜縮手。遺札猶在几。先生今烏有。江太僕萬仞

山中讀南華

木以不材壽。雁以不鳴死。誰謂莊生達。任營猶爾爾。世罕百年人。逝如東流水。材與不材間。相去能有幾。鳧雁羈稻梁。山樗依巽蟲。邱壑堪藏身。榮祿禍所倚。悠然濮水釣。涂中自曳尾。莊生豈不材。韜真以沒齒。

王家屏一首

家屏字忠伯大同山陰人隆慶戊辰進士選庶吉士授編修進修撰歷侍講學士擢禮部侍郎改吏部兼東閣大學士入預機務進禮部尚書太子少保贈少保諡文端再贈太保有詩集二卷

田按文皇四駿圖詩四篇在張太岳集中而詩綜據館課集本屬之文端余檢文端詩集亦無此四詩則自館課集之訛未可援以爲據也文端立朝不阿奏疏侃侃直言有古大臣風詩多酬應之作非其所長

送劉太史秦藩使道省觀

綠鬢神仙侶青雲侍從臣校藝依日月捧節下星辰桐葉遙分陝皇華近使秦
襄帷瞻華嶽飛旆度河濱
宴設新豐酒花明灞澹春趨庭紆畫錦里閤溢光塵

陳于陞一首

于陞字元忠南充人隆慶戊辰進士選庶吉士授編修歷侍講學士拜禮部侍郎改吏部進禮部尚書兼東閣大學士入參機務加太子少保文淵大學士進太子太保贈少保諡文憲有萬卷樓稿

田按文憲集罕見余從劍閣芳華集錄詩一首

華山紀遊

名山縹緲闕靈蹤路入金霄瑞氣封箭括通天青一徑蓮花拔地翠千重日華東映標仙掌山勢西來帶

雪峯欲馭長風理瑤策。更攜三秀跨茅龍。

張位一首

位字名成。新建人。隆慶戊辰進士。選庶吉士。授編修。選侍講。改授南司業。謫徐州同知。擢南尚寶。丞。召爲左中允。進祭酒。擢禮部侍郎。改吏部。兼東閣大學士。入參機務。進禮部尚書。文淵閣大學士。加太子太保。再進少保。吏部尚書。武英殿大學士。奪職閒住。尋除名爲民。遇赦不宥。天啓中復官。贈太保。諡文莊。有閒雲館集鈔六卷。

靜志居詩話。文莊以持正忤江陵。詩頗有憂危之語。其詠射鵰云。方寸能幾何。當此亂鐵投。有感其言之也。既罷相。於東湖杏花村。建閒雲樓。吟眺自娛。晚探青原之勝。汎舟螺川。野服篋車。登覽竟日。老僧不識爲宰相。題詩懷鄒魯。瞻門人。胡廷宴守吉安。從寺壁見詩。始知之。是亦佳話。

田按。新建以遼事敗。奪職除名爲民。明之存亡。在此一舉。天啓中。乃復官予諡。所謂亂朝之政。不可以究詰也。

宿化城寺

峭磴疑無路。靈源別有天。暮煙籠合嶂。春水漫平田。境僻少塵事。山空清客眠。外韜含內美。此地得真詮。

沈一貫八首

一貫字肩吾。鄞人。隆慶戊辰進士。選庶吉士。授檢討。歷中允。侍讀。學士。擢吏部侍郎。加太子賓客。進南禮部尚書。改北。兼東閣大學士。入預機務。進太子太保。戶部尚書。武英殿大學士。累加少傅。

兼太子太傅、吏部尙書、建極殿大學士、贈太傅、諡文恭、有喙鳴集十八卷。

列朝詩集。戊辰史館大拜者七人。以詞章擅名者。東阿、鄆縣、鄆縣之才筆。秀於東阿。

田按。鄆縣相業不足言。少師事沈明臣。稱爲句章公。又與黎惟敬、歐楨伯輩往還。故詩筆頗擅麗藻。

山陰道中

最是山陰道可憐。青蒲白鳥浴晴川。一奩水鏡疑無地。九疊山屏直上天。向浦歌聲春社鼓。隔江燈影夜漁船。誰能乞得君王賜。不戴黃冠已是僊。

送黎惟敬歸嶺南

蘭舟桂楫恨悠悠。海北天南自此休。梅子雨時過庾嶺。桃榔夢裏到番州。不知茗椀同誰坐。定有花燈入夜遊。應恨塞鴻飛不去。萬山回合一羅浮。

送歐楨伯之南都

水部移官向舊京。似將明月共南行。青門楊柳辭賓御。白下風雲待主盟。詩爲三山憐客老。酒因羣俊覺杯輕。六朝遺事何須問。苑柳宮花日夜生。

沔南懷告

曾向齊門歌二桃。因從帝子說三刀。兩朝涕泣吹餘燼。五月踉蹌渡不毛。鼎足已知天意定。江心猶隱陣

雲高。河南祠廟終今古。蛇虎縱橫護六韜。

寄內

暮雲天遠桂樓深。三月韶華半有陰。鳳字時來空宛轉。魚書何處付浮沈。銅鈺月掩三更夢。寶篆煙消五夜心。最恨吳娃舊歌曲。朝朝暮暮起江濤。

寶劍

赤堇山開不可鑪。若耶溪竭有銅無。城量珠玉終難見。白日燕山狎狗屠。

蹴鞠

小桃微雨夜來香。朝入雞坊暮狗房。無賴楊花偏解妬。團風先占打毬場。

聽琵琶

天關直北是居庸。夜半期門紫翠重。遂有春聲傳樂府。琵琶宛轉唱黃龍。

鄭汝璧二首

汝璧字邦章。縉雲人。隆慶戊辰進士。授刑部主事。歷員外郎中。改禮部。吏部。遷太常少卿。出爲福建參議。歷廣東副使。河南參政。山東布政使。以僉都御史巡撫山東。改延綏。進兵部侍郎。總督宣大有。由庚堂集。

愚谷雜詠二首

委巷稀塵鞅。城居似遠村。芰荷衣乍製。松菊徑猶存。晦跡從牛僧。閒情共鳥言。平生饒野趣。樂志仲長園。
卜築家山半。雙峯對草堂。巖欹斜引磴。松礙別開廊。留客呼浮白。逢僧學坐忘。陸沈徒復爾。廣莫是吾鄉。

蔡文範三首

文範字伯華。瑞州新昌人。隆慶戊辰進士。除刑部主事。遷兵部郎中。出爲湖廣提學。□□進廣東參議。有縉雲齋稿。甘露堂集。

靜志居詩話。青門近體雄渾絕倫。

自瀛德趨東昌道中雜言三首

風壤連齊魯。河流匯衛漳。愁思斜日外。衰髻驛亭旁。江鷺凌寒浴。飢鳥下食將。頻來舟楫上。憂患飽經營。
碣石銜天府。清漳解北流。星槎天上使。簫鼓驛邊舟。岸柳紆行旆。州兵護彩旒。還聞元夕近。燈樣自南州。
撰柁憐三老。開船禱石尤。峴陽空自照。陰靄未全收。得食鷓鴣嘯。經時枳橘秋。孤舟且飄泊。吾道任悠悠。

朱孟震十二首

孟震字秉器。新淦人。隆慶戊辰進士。除南刑部主事。歷郎中。出知重慶府。歷陝西。山西副使。四川按察使。貴州布政使。入爲順天府尹。以右副都御史巡撫山西。有郁木生全集。

四庫總目孟震詩音節諧暢而意境不深。

吳國倫餽甄洞續稿乘器詩諸體錯陳爛然有第高不至詭異卑不至儕俗。

張九一綠波樓集乘器詩爾雅深厚。

靜志居詩話乘器津津以詩家自許其在南曹結青溪社一時名士響應氣求所輯楮談餘談述先詰之舊聞綜同人之麗句可謂好事也已。

田按乘器詩音節瀏亮選詞雋雅與張助甫品格相似。

玄武湖

玄武湖頭春可憐。遶隄花柳媚遙天。風微鳧鷖參差下。日麗樓臺紫翠連。龍氣深湫晴似雨。馬蹏芳草煖浮煙。白雲自是神仙署。誰道蓬萊弱水邊。

莫愁湖小集呈汪仲嘉諸君子

莫愁湖上雲氣開。蓮花雙槳蕩舟來。盧家歌塵久寂寞。石城山色今崔嵬。詞客千秋飛翰墨。王孫此地有樓臺。清時文酒能高會。落日孤懷轉壯哉。

讀留侯傳

帷幄全收佐命功。帝師原自有仙風。拂衣未棄人間事。進履先逢圯上公。一劍夜寒芒碭澤。五雲秋老未央宮。到來鍾室嗟何晚。羨爾深藏異日弓。

習家池

斜日城南興不孤。習池風景倍踟蹰。誰爲馬上狂山簡。我自高陽舊酒徒。三峴凍雲迷遠樹。半江寒月澹平蕪。何人更唱銅鞮曲。千古能消一醉無。

漳河懷古

漠漠平沙送客襟。乾坤雄峙昔年心。春風銅雀有興廢。斜日清漳無古今。七子才名空寂寞。三分霸氣總銷沈。人間何處征西墓。凍草寒雲結恨深。

大佛巖午憩

大佛巖懸一百尺。江濤東下湧驚飈。舟航白日雷霆鬪。竹樹青天霧雨驕。衲子誦經龍竊聽。使君回轡鶴相邀。蒲團小坐茶煙午。那得塵襟不盡銷。

蜀忠武侯祠

流水無聲繞薜蘿。三分籌策竟如何。南陽龍去英雄盡。西蜀鵑嘯風雨多。雲鳥縱橫魚復浦。星辰搖動錦江波。千秋涕泗秦州表。白日精靈更不磨。

秋日金沙寺贈珠上人

萬里橋東覺路偏。層樓開傍蔚藍天。閒雲幽鳥爾何意。翠竹黃花最可憐。人去問奇空有字。寺有楊升菴碑。中多奇字。

客來聞梵欲忘筌。出門相送蒼煙暮。卻對溪流一灑然。

龍門賓陽洞寄謝李使君

賓陽洞前伊水長。楚客炎夏來徜徉。岩巒只去天尺五。闌檻宛在水中央。使君別意誰深淺。遊子歸心正渺茫。今日龍門還御李。不禁清興劇飛觴。

寄懷歐楨伯

水曹曾聽秣陵鐘。聞說官梅寄興濃。書到遙憐玄草色。詩題偏問浣花蹤。舊遊待詔三千牘。新卜羅浮第幾峯。漂泊故人還吏隱。冥鴻霄漢杳難從。

春興

含笑桃花作態新。綰情楊柳弄眉頻。那能不醉雲安酒。春色憐人似故人。

桃葉渡

桃葉渡前芳草迷。綠槐高柳岸東西。停舟日暮行人盡。流水一灣鶯亂嘯。

龔勉二首

勉字子勤。無錫人。隆慶戊辰進士。除嘉興知縣。改吳橋。遷南刑部主事。改戶部。歷員外郎。中出爲嘉興知府。遷浙江參政。進本省按察使。改山東。遷浙江布政使。有尙友堂集。

弇州山人續稿子勤古體於左司近體於香山當其得意匿甲而乙不至相徑庭

贈丁隱居

雲臥吳門客。翛然遠俗情。才高文寡和。身隱道先成。白髮窮莊叟。青山老伏生。幽棲求大藥。遠思託蓬瀛。

元日同仲山王先生過蒙泉莊先生書屋

舊圃開新往。方塘一檻清。草玄亭始就。問字坐常盈。遶屋青山色。到門流水聲。慚余時造席。鼓瑟似侯生。

習孔教一首

孔教字時甫。廬陵人。隆慶戊辰進士。選庶吉士。授□□歷官南吏部侍郎。

恭陪北郊禮成有紀

良辰屬朱明。祠官肅方澤。天子禮皇祇。羣工助精白。景風應函鍾。高燎揚廣陌。上公秉黃琮。太史奉素冊。六變樂初成。萬靈馨具格。熙朝重殷典。微臣叨服役。趨踰從黜牲。舞蹈依紺席。始待空桑鳴。終裸白茅藉。展采偕有司。齋心保無斃。資生荷弘載。美報感疇昔。虞類合園丘。周禮分泰坼。今古殊儀文。恪恭自朝夕。汾陰空樓船。雍時已陳迹。納履下紫壇。稅冕蔭蒼柏。賦擬獻甘泉。才應執爨蹠。

劉應麒一首

應麒字道徵。鄱陽人。隆慶戊辰進士。選庶吉士。改禮部主事。歷郎中。出爲廣東副使。改廣西。歷四

川參政湖廣按察使浙江布政使以右僉都御史巡撫應天乞歸起南大理卿工部侍郎俱不赴拜兵部侍郎命下先卒

秋日同友人泛東湖

剩有南樓興還登湖上舟晚涼初吠蛤柔艣不驚鷗老去稀同輩觴行緩百憂自憐遲暮日猶逐少年遊

鍾庚陽一首

庚陽字長卿秀水人隆慶戊辰進士除太平推官入爲大理評事遷工部主事歷員外郎中出知鎮江府謫廣德知州終刑部員外郎有焚餘集

眞州守風岳水部石帆移酌舟中

同是飄零客江濱載酒過潮生秋氣早樹帶夕陽多鳩掘方棲棘鴻冥豈受羅相看此風色不飲夜如何

沈懋孝一首

懋孝字幼眞平湖人隆慶戊辰進士選庶吉士授編修進修撰遷南司業謫兩淮鹽運司判官有琪林雅詠

靜志居詩話晴峯樂府句摹蕭傲不脫歷下窠白餘體斐然能於同中見異

田按幼眞論詩云友朋離合登臨流覽吾取法李于鱗又云舉世昧昧此境將蕪于鱗之目不瞑可謂篤信其自運殊乏警特

古意

落花天氣春餘幾。垂柳青青日又曛。深立繡簾人不見。輕風吹動鬱金裙。

賈三近二首

三近字德修。澤州人。隆慶戊辰進士。選庶吉士。遷吏科給事中。改戶科。進太常少卿。改督四夷館。歷大理少卿。南光祿卿。改北。以右僉都御史巡撫保定。召拜大理卿。進兵部侍郎。有東掖漫稿。

穀成山館集。石葵歌詩。清爽疏宕。咳唾立成。

明妃村

荆門草色幾經春。十里江花尚錦茵。試問峨眉山上月。當年曾見漢宮人。

重遊青檀寺

水落前溪碧樹秋。西巖蘭若幾經遊。危巢野鶴何年去。舊識山僧今白頭。

顧大典一首

大典字道行。吳江人。隆慶戊辰進士。授山陰教諭。歷處州推官。遷南吏部郎中。出爲山東僉事。遷福建副使。謫禹州知州。改開州。有清音閣集十卷。

閨思

朝日斜照戶，垂楊低拂床。新篁未解籜，幽蘭已謝芳。玉筯流殘粉，金爐冷夕香。羅衾空有夢，無信往遼陽。

陳巖之一首

嚴之字泰仲，閩人。隆慶戊辰進士，累官雲南副使。

送僚友謝病還蜀

北闕辭供奉，西風獨遠行。輕裝歸故國，祖帳愴離情。月落銅梁樹，雲隨劍閣旌。馬卿多病渴，何日賜金莖。

沈思孝一首

思孝字純父，嘉興人。隆慶戊辰進士，授番禺知縣。入爲刑部主事，以疏論張居正奪情，廷杖戍神電衛。居正死，召復官，進光祿少卿，改太常少卿，遷順天府尹，改南太僕卿，病歸。起南光祿卿，進右僉都御史，巡撫陝西，改撫河南，不赴。召爲大理卿，進工部侍郎，遷右都御史，協理戎政。天啓中，贈太子少保，有行戍郊居，西征陸沈諸稿，溪山堂、吾美堂等集。

四庫總目：思孝有韻之文，流麗清脫。

橋李詩繫：純父格調幽疏，聲文華潔，長於近體。

田按：江陵在位，安內攘外，功自不可沒，而暴戾恣睢，挫辱正人，純父與艾和父合疏論其奪情，廷杖八十，逮繫之辰，蔡伯華入視純父，雪涕言曰：消息危甚，吾必棄官扶而輓還，偵者瞪目視之，伯華神色自若，純父被杖後，血肉淋漓，下獄三日，始僉解戍，神電衛巡撫劉夢誨者，江陵黨也，以尺符召之，且牒尾手署曰：過期一日，并逮卒杖之死，純父行至恩平，病不能前，縣令促之。

純父袖一七首示令曰。中丞必欲殺我。我與之俱斃耳。不然。即伏尸軍府中。今天下士大夫皆知中丞殺我也。堯誨聞之氣阻。得不死。伯華作壯哉行以紀其事。純父之行也。王弇州。胡元瑞。袁景從。有詩送之。其底成所也。講經授徒。蔡郡丞。懋昭爲構借山亭。海剛峯有文。朱宗良有詩紀之。其召還也。弇州輩復爲歌詩以張之。弇州詩云。萬死投荒不自嗟。片鴻驚我白鷗沙。神交豈必從傾蓋。身在何須復論家。過嶺清霜披瘴色。懷人古戍有梅花。江山處處堪文苑。莫遣窮愁負歲華。元瑞詩云。一夜飛章動紫宸。衣冠回首避龍鱗。千秋愁濺孤臣血。萬死猶存逐客身。燕嶠雪霜懸疏草。日南花鳥候行旌。遙知到日羅浮夜。獨倚吳鉤望北辰。景從詩云。謫去君何意。臨行解佩刀。憂危甘鼎鑊。忠信涉波濤。嶺海風煙直。江雲瘴癘高。天王自明聖。行矣莫辭勞。宗良詩云。百粵羣山盡鬱盤。草亭孤倚白雲寒。高情不爲投荒憾。絕傲翻同勝境看。瘴海煙霞聊擁膝。蘆廬天地一憑闌。傳聞已下巖廊召。回首銅魚路渺漫。弇州歌送純父北上兼訊艾光祿。趙宮贊云。純父自捧金雞杖。歸奉嚴親五湖社。閉戶初憐此身得。傍人再訝除書下。毋論當路急需賢。我自鑿坏猶勸駕。繁霜臘作吳門冰。勁節與之鬪峻嶒。疇當鼓棹如漁父。誰不呼舟並李膺。此時絳灌須辟易。此際風買仍馮陵。承明璽郎初儼直。萬里天顏今咫尺。臣直轉彰人主仁。君肥卻慮吾民瘠。光祿艾卿。趙宮贊。握手生還玉門色。趙子夙昔同襟期。艾鄉亦忝文字知。但令朝著有三益。容我衡門歌四雖。君不見發弩健兒縱驪鼠。又不見埋輪使者甯狐狸。丈夫有才莫小用。他日舜世肩皋。夔元瑞聞純父內召作云。南過銅柱絕風塵。北望金門戀隱淪。豈憚花前千里夢。枕椰樹底十年人。驂鸞盡閱名山色。驅鰐長流大海春。聞道天雞來旦暮。可令宣室遲孤臣。

秋日閒居

墩火照西州。專征白露秋。蓬婆城不閉。羅鬼戍還留。轉餉盤江惡。徵兵蜀道愁。銅標誰更勒。空憶武鄉侯。

唐可封一首

可封字□□富順人。隆慶戊辰進士。官南戶部郎中。

後湖同官讌集

玄洲開冊府。勝覽集仙才。倚權迴春甸。尋芳過古臺。煙花湖上麗。鷗鷺鏡中來。夕照重回首。漁歌正溯洄。

陳堂一首

堂字明佐。南海人。隆慶戊辰進士。累官光祿少卿。有朱明洞集。

二月久雨簡鄰父

浹月多陰雨。花愁不似春。久無新燕至。似厭主人貧。車馬嗟歧路。江山羨隱淪。相期聊一醉。長作灑西鄰。

張一桂一首

一桂字玉陽。祥符人。隆慶戊辰進士。選庶吉士。累官吏部侍郎。

慶成宴

千官拜舞載堯觴。泰時回鑾樂未央。瑞日乍臨仙闕曙。祥風輕拂御爐香。酒分醴醑傳鸚鵡。樂奏簫韶下鳳凰。共沐恩波何以報。願歌天寶祝吾皇。

華叔陽二首

叔陽字起龍。無錫人。學士察子。隆慶戊辰進士。除禮部主事。有禮部集八卷。

四庫總目。叔陽爲華察之子。王世貞之壻。所作五言頗有父風。

春晚同韓存良諸君郊外燕集

投身嬰塵役。坐惜春暉馳。忽枉嘉侶招。暫愜林中期。晴靄冒芳甸。柔風披綠蕤。遂浹班荆好。因懷修禊時。垂楊蔭長坂。落英汎清漪。玄言超俗趣。戀賞杯行遲。覽勝豈必遐。所貴獲衷私。故山多白雲。緬焉勞我思。

早秋夜坐

炎歊欣夕歛。秋意滿幽堂。帙散閒堪把。琴清靜自張。疏星帶高樹。微月明虛床。何處遙鐘起。塵心坐欲忘。

唐邦佐二首

邦佐字惟良。蘭谿人。隆慶戊辰進士。授泰和知縣。改如臬。儀真。入爲刑部主事。謫兩淮運司判官。改贛州府通判。遷光州知州。有比部集。

病後齒落垂盡感歎

垂老心猶童。覽鏡朝未置。摘白整吾冠。謂老或可諱。豈知齒牙脫。衰態難自蔽。因憶爾初生。玉白銛鋒利。相從能幾何。竟作鉛刀廢。毋乃肥甘傷。得非言語累。始脫殊自驚。向人重含媿。次第日以多。安危不復計。亦知本根撥。枝葉終應墜。投非東窗梭。去作下阪驥。從茲三緘口。至理有深契。

贈吳孺子

吾憐吳孺子。瀟灑出人羣。真隱非幽壑。孤蹤似野雲。三江春欲徧。五岳杖平分。訪古山陰道。先尋禹廟文。

帥機二首

機字惟審。臨川人。隆慶戊辰進士。授汝甯教授。改國子學正。遷兵部主事。乞南。改禮部。歷郎中。謫兩浙鹽運司運副。歷彰德同知。遷南刑部郎中。出爲思南知府。有陽秋館集四十卷。

湯顯祖玉茗堂集思南君詩深穠澹簡率境而成。

列朝詩集萬曆甲午西夏平惟審進頌詔付史館與湯養仍爲友惟審爲南膳部郎義仍入南成均晨夕過從故有著冠須訪戴脫冠須訪帥之詩惟審多讀古文奇字好詞賦擬古二京及諸篇什僅存營魄要爲淹雅名士田按惟審守思南獎拔士類多所成就五言研練不爲義仍之灑體惜不得其全集錄之。

由從姑山登麻姑山

從姑邇郭門。峯高徑亦窄。巖下列僧房。亂泉時瀝滴。束竇徑穿雲。陰洞容枕席。漸高境彌佳。天橋霄漢迫。遙望麻源山。明發究登歷。雨意始蒼茫。晴暉生嵐色。霏煙結冥濛。丹井函純白。三復謝公詩。慷慨顏君石。想見玉女蹤。嗚佩安可覲。洞天舊占名。仙都果繁籍。平生慕江海。此日探靈跡。誓委九年心。欲搏萬里翼。緬懷周續之。竄景駐衰歷。

送客寓清涼寺

水殿清幽歌館餘。今朝化作梵王居。後庭花謝胭脂冷。猶自涼風薄綺疏。

方沆二首

流字子及莆田人隆慶戊辰進士授全州知州遷南戶部郎中改刑部出爲雲南僉事謫甯州知州有猗蘭堂集

玉筍詩談子及詩非貞元大歷以上語不道余出守瀘州後子及乃入青溪社同社中七君子納涼詩高閣憑臨野望寬翩翩賦客共登壇百年逸氣還河朔七子才名自建安牛渚風生檣影動龍山翠落酒杯寒悠然鐘磬江城暮不盡狂歌更倚闌閩書喻邦相云子及詩如秋山吐色靜女揚蛾五言尤勝

蘭陔詩話子及少時避地邵武學詩於吳明卿在南曹日與陳子野輩結青溪社詩律益進五言如山合松楸晚沙寒橘柚秋瘴深青草候地控白狼西七言如華表月明疑鶴下孤臺風起有龍吟江魚愁阻經年字檣燕低窺隔水簾曲水暗通花下艇羣峯晴擁竹西樓徵歌子夜供清賞結客丁年佐勝遊固是中唐人語

田按子及詩音節高朗

詠古

叔夜稱龍性貽書絕良朋當其鼓鍛時意氣良自矜養生慕松喬絕響託廣陵嗟彼冥鴻翮竟罹繳與矰援琴赴東市咄咄愧孫登

送羅惟敏比部暫告還吳門

一疏辭丹陛雙旌出舊都倦遊成傲吏高論著潛夫秋水三江釣春雲五嶽圖懸知金虎署遙夜法星孤

喻均二首

均字邦相。新建人。隆慶戊辰進士。除工部主事。以事謫官。尋遷蘭溪知縣。歷處州。松江知府。進天
津兵備副使。有蘭陰。虎林。仙都。括蒼。雲間。前後山居等集。

弇州山人續稿。邦相詩文。氣雄調古。往往出人意表。

詩藪。近日詞場。自吳楚。嶺南外。江右獨爲彬蔚。與余交最久者。喻邦相。胡孟賡。朱可大。喻如。浙江觀潮。雁宕。天台等作。胡如天。津望海。匡廬。彭蠡諸篇。朱如泰岱。嵩高。兩岳遊稿。皆高華雄邁。與嘉隆相表裏。

田按。邦相入鄉。那四子之列律句。琅琅振玉。

贈別沈純甫謫戍入粵。純甫舊令粵。有遺愛焉。故次篇及之。

誓死銅龍效朴忠。餘生還識主恩隆。向來共道詞華麗。此去兼傳諫草雄。炎海月明乘障後。羅浮秋色入
杯中。故人亦是清狂者。轉向休文恨不窮。
楚江風送逐臣舟。那得平原十日留。客夢暫隨萍梗合。離心數傍瘴雲浮。洲前芳草悲公子。嶺外梅花識
故侯。最是番禺諸父老。不禁清淚向君流。

田一儁一首

一儁字德萬。大田人。隆慶戊辰進士。選庶吉士。授編修。進侍講。屢遷禮部侍郎。贈禮部尙書。有鍾
臺遺稿十二卷。

無題

兩朝勳業列旗常。連正台階十五霜。功格皇天誰可比。只應前世有空桑。

國史唯擬田一儁無題詩。爲江陵奪情發也。又春日偶感詩云。兩夜東風作意吹。桃紅李白冠當時。多情卻恨春光少。底事同林隔一枝。似指張懋修。嗣修兄弟。若云曷少渠家一探花耳。情見乎辭。

胡來貢一首

來貢字順菴掖人。隆慶戊辰進士。累官大同巡撫。

寄人

雪中寥落故人稀。卻憶平原識布衣。惆悵不堪聞戍角。梅花一夜落金微。

程拱辰一首

拱辰字仲星。莆田人。隆慶戊辰進士。歷官應天府尹。就遷南通政使。

釣臺

煙水環山碧。不見垂綸客。空餘此高臺。惆悵千年迹。

葉丸金一首

丸金字廷相。莆田人。隆慶戊辰進士。歷官江西僉事。

送沈二丈下第南歸

握手臨流共醉歌。相看意氣竟如何。河橋柳色愁中盡。禁苑鐘聲夢裏多。此日琴樽清夜短。幾時湖海客星過。古來白璧終須售。莫向荆山泣卞何。

徐大任一首

大任字重夫。宣城人。隆慶戊辰進士。除工部主事。歷官工部侍郎。

飲袁家園

白雲山雲樹好。況復此亭林。牆不礙山色。池能清客心。蓬蒿蹊未沒。濠濮想偏深。幸有羊求在。名園豈陸沈。

胡汝煥一首

汝煥字文甫。南昌人。隆慶庚午舉人。

六郡良家子

六郡良家子。翩翩意氣雄。結營當太白。吹劍拂長虹。心折胡塵外。名高漢殿中。請纓君等事。長揖莫論功。

梁岳一首

岳字□□。廣州順德人。隆慶庚午舉人。官瑞州推官。

浪遊淹歲月。倏爾鬢毛斑。舟楫飄零苦。關河去住艱。停雲思故國。貫酒破愁顏。芳草江南綠。王孫幾日還。

明詩紀事卷十

庚籤

張元忭一首

元忭字子盡紹興山陰人隆慶辛未第一人及第授修撰進左諭德兼侍讀有不二齋文選七卷登第後寄親友

昔余秉微尚築室稽山幽嘉朋日萃止六籍事冥搜顧慙學術疏徒然抱先憂屬時際休明葑菲誤見收弱羽乘風雲眇質依嵩邱皇恩等蒼天捐糜難爲酬寤言循素履黽勉希前修眎彼鴻鵠舉詎爲稻粱謀

鄧以讚一首

以讚字汝德新建人隆慶辛未第三人及第授編修移疾歸起中允不赴再起南祭酒就遷禮部侍郎改吏部再改北吏部贈禮部尚書諡文潔有定字先生集四卷

田按文潔通籍後居西山三十年在官僅滿一考清介之風可以抑浮競與華亭陸文定後先媲美

答張洪陽道房見寄

聞雁秋懷起。思尊歸夢頻。暫陪仙署吏。自是倦遊人。有病過從少。無家僮僕親。壯心今幾許。清賞在江濱。

吳中行二首

中行字子道。武進人。隆慶辛未進士。選庶吉士。授編修。以論張居正奪情。廷杖爲民。居正死。起故官。進右中允。歷洗馬。攝司業事。進右諭德。乞歸。起南侍讀學士。掌院事。未任。贈禮部侍郎。有賜餘堂集十四卷。

靜志居詩話。江陵奪情。事在萬曆五年七月。逾十月之朔。彗星見。大內火。於是既望三日。吳公疏上。次日。趙檢討用賢疏上。又次日。艾員外穆。沈主事思孝疏上。江陵怒不可止。而諸公均受杖矣。方杖時。鄒進士元標疏復上。一時士氣持正若是。許文穆以庶子充日講官。爲吳。趙二公餞。鐫玉杯一銘。曰。斑斑者何。卞生淚。英英者何。蘭生氣。追之永成器。以贈吳公。犀杯一銘。曰。文羊一角。其理沈黜。不惜剖心。甯辭碎首。黃流在中。爲君子壽。以贈趙公。玉杯今不見。犀者爲吾鄉。何少卿。蕤音所得。余嘗飲此作歌。

田按。子道集中植綱常疏。爲江陵發也。正朝廷疏。爲吳門發也。是時吳門爲言路所詆求去。九卿多上疏留之者。子道疏云。借留賢之名。而保輔臣。此詔諛之極也。甚可恥也。上言大臣德政。律有明條。輔臣者股肱也。或因事乞歸。被言投劾。宜去宜留。聽之朝廷。何邇年以來。每遇輔臣辭位。必羣然起而留之。頌功贊德。累牘聯章。此其心何心哉。其言甚正。子道與趙用賢論江陵奪情被杖。江陵死後起官。上頗嚮用。史稱用賢性剛。負氣傲物。數嘗議大臣得失。言官江東之李植輩爭嚮之。大學士申時行。許國等忌焉。會植。東之攻時行。國遂力詆植。東之。而陰斥用賢。中行謂昔之專恣在權貴。今乃在下僚。昔顛倒是非在小人。今乃在君子。意氣感激。偶成一二事。遂自負不世之節。號召浮薄喜事之人。黨同伐異。罔上行私。其風不可長。蓋國先與吳。趙同。

官翰林。刻玉杯犀杯贈之。其詞激烈。厥後國入政府。附和吳門。又吳趙爲上所需用。心思之。遂肆口詆訾。不遺餘力。利害切膚。與向所贈之詞。先後刺謬。君子於此觀人品焉。

送王龍州座師使事還里

太行秋色不禁寒。六傳西征擁繡鞍。使節再將仍問俗。除書兩考不遷官。內廷供奉含香侍。故國馳驅負弩看。清世台垣多氣象。上卿早晚入長安。

過彭城簡莫憲使

幕府依然病客過。只今無夢到鳴珂。官情合自風波減。聖德元從雨露多。高枕尋常消白日。片帆信宿下黃河。夕陽貰得新豐酒。何處逢君一醉歌。

周嘉謨一首

嘉謨字明卿。漢川人。隆慶辛未進士。除戶部主事。歷郎中。出爲韶州知府。歷四川副使。按察使。布政使。以右副都御史巡撫雲南。進督兩廣軍務。兼巡撫廣東。加右都御史。遷南戶部尚書。召拜工部尚書。改吏部。以忤魏忠賢引歸。削籍。崇禎初起。南吏部尚書。加太子太保。贈少保。

田按少保正色立朝。當魏忠賢得志之初。持正不阿。屢疏求退。忠賢矯旨許之。其陛辭出朝詩云。連章得請賦來歸。丹陛陳情淚溼衣。自信心長緣髮短。敢云昨是覺今非。兼驅猛獸無長策。閑伴浮鷗有息機。獨使至尊勞盱食。難將寸草答春暉。夫惟大雅既明且哲。少保足當之矣。

答胡公占

幽興從來愛薜蘿。名園高峙帶江沱。竹間有客攜琴入。花裏容人載酒過。百里星原因德聚。一宵話勝讀書多。只今春色郊原滿。何日相期臥綠莎。

王祖嫡三首

祖嫡字胤昌。信陽州人。隆慶辛未進士。選庶吉士。授檢討。遷國子司業。歷洗馬。進侍讀。有師竹集三十七卷。

田按時人有議王元美父杼之禍爲元美激之者。胤昌作書辨之曰。人言分宜父子甘心楊忠愍。元美時爲郎。與二三君子哭之痛。相嗣聞而惡之。謂所親曰。胡不移此哭乃公。由此司馬公不免。嗚呼。司馬公之冤。不繫元美哭與不哭也。昔漢暴彭越。屍有哭者。夷三族。而樂布哭之。後世且多其義。茲忠愍非越比。又無禁令。乃於不可知之事。不可測之禍。傳仁人孝子耶。至於沈涵縱飲。必分宜當國時。元美畏禍。故以此自污。不則洩憤宣鬱。昔人所謂長歌之痛者耳。元美引之四十子之列。且贈詩曰。傾蓋豈必深。慨焉成辨謗。卽此謂也。胤昌詩長於詠古。

溫泉

幽薊煙塵激九重。貴妃湯殿罷歌鐘。中宵扈從無全仗。大駕蒼皇起六龍。妝匣尙留金翡翠。暖池猶浸玉芙蓉。荆榛一閉朝元路。唯有悲風吹晚松。

乾陵

乾陵雙闕峙高岡。象馬夷酋儼列行。一代大倫爭子姪。三朝宏業忽周唐。南山枉費秦皇錮。西盜終窺呂雉藏。無字穹碑誰記述。九原重起駱賓王。

岳墳

殘雪方舟渡六橋。棲霞祠宇薦山椒。金牌鐵馬無勞問。白馬朱旗尙可招。北宋陸沈三字獄。西湖水接伍胥潮。祁連鬱鬱環孤塚。麥飯諸陵久寂寥。

馮時可二首

時可字敏卿。松江華亭人。隆慶辛未進士。除刑部主事。改兵部。歷員外郎中。出爲貴州副使。改四川。歷廣西湖廣參政。有西征超然樓。天池石湖皆可繡霞。北征後北征。燕喜滇南。武陵等集。

明詩選。陳臥子曰。吾鄉元成。可方吳門劉子威。

靜志居詩話。元成詩極爲牧齋錢氏所詆。就全集而觀。甫田彌望。稂莠汗萊。獨五古一體。尙有遺棄滯穗。可供捃拾。以比劉子威。翻覺勝之。

田按。元成博綜。下筆千言。娓娓不能自休。談史談藝。當時異聞軼事。往往散見集中。惟詩不能成家。

遊飛雲巖

自余探幽賞。會心惟此山。突兀聳芙蓉。支嶺若連環。攢丹冠斜日。浮翠亂秋煙。溜溜滴竇乳。泠泠響溪泉。苔壁圖綵繡。松濤韻清絃。侵戶澗芳馥。射衣雲影鮮。去美非一適。來奇變萬端。狗華豈達生。獨往復何言。

馮時可西征紀。宿月潭書院。時已夜半。泉流有聲。疑爲風雨。疏軒視之。星河森煜。由樓後躡石磴折而上。謂飛雲巖。去地百餘尺。上突下嵌。巖下可坐數百人。石如虬奮如蜺矯如霞攢。勢飛動。左有深洞。巖前三石峯如三指。志稱錦崖珠壑。非虛也。

田按。飛雲巖在黃平州城東二十里。爲吾黔最奇之境。王陽明有記。

同申少師飲凡夫齋中

緬懷新築勝。丹閣俯嶙峋。開挈山中相。幽尋世外人。瀑飛剡溪雪。花發武陵春。便欲移家住。於斯並采真。

郭子章一首

子章字相奎。泰和人。隆慶辛未進士。除建甯推官。遷工部主事。歷郎中。出爲潮州知府。遷四川僉事。歷浙江參政。山西按察使。湖廣。福建布政使。以右僉都御史巡撫貴州。進兵部侍郎。右都御史。兵部尙書。加太子少保。有粵草十卷。蜀草七卷。浙草十六卷。晉草九卷。楚草十二卷。閩藩草九卷。家草七卷。黔草二十一卷。養草一卷。苦草六卷。傳草二十四卷。

過餘慶司

餘慶山行踏磴危。幸逢春仲日遲遲。荒村祭賽仍茅屋。新戶編門半竹籬。夾道櫻桃開白蕊。隔江楊柳換新枝。猶聞豺虎當吾路。去去埋輪一問之。

黃洪憲一首

洪憲字懋忠。嘉興人。隆慶辛未進士。選庶吉士。授編修。奉使朝鮮。還進侍讀。歷右庶子。遷少詹事。

掌翰林院事有碧山學士集二十一卷別集四卷

田按碧山學士萬歷戊子主順天試取王文肅子衡爲榜首李鴻又申文定壻也爲言者攻訐朝命覆試文皆如格學士疏十上乃得歸後言者猶以爲口實在籍聽勸學士工於制舉文詩非所長

上疏後長安友人相訊賦謝

闔闔天高五鳳樓。覆盆何幸徹宸旒。故人霄漢誰青眼。老我江湖已白頭。涉世總知名是累。論交惟有淡相投。山翁到處堪瓢笠。一笑從人呼馬牛。

郭子直一首

子直字舜舉崇德人隆慶辛未進士除行人歷官福建按察使有三遊草

小園

扶疏草樹繞空亭。隱几山光雨後青。吏散鴉啼明月上。一簾花影讀黃庭。

劉珠一首

珠字福井公安人隆慶辛未進士除戶部主事有疑菴集

國史唯疑劉珠舉丁酉鄉試越三十五年辛未始成進士江陵少以父執事珠每計借攜一烘魚爲饋諸僕役熟識之曰公安孝廉又來矣卒爲江陵所取士壽日獻詩要知座主山爲壽但看門生雪滿頭江陵笑曰此老故態也然珠無所附麗又十年終計部郎想世態已所熟閱

過襄陽

高城百尺倚雲霞。夾道垂楊盡宿鴉。春雨綠添習池水。晚風紅落大隄花。橋橫畫舫明江岸。人唱銅鞮過酒家。景物不殊鄉土近。高堂猶自憶京華。

熊敦朴一首

敦朴字茂初。富順人。隆慶辛未進士。改庶吉士。累官貴州參議。有玉堂漫稿。謫居稿。

送沈比部謫高州

當代論才子。人推沈隱侯。一身重彝鼎。萬事等浮漚。已分沈湘去。難期衆楚咻。遷人終汨沒。天意欲沈浮。聞道高涼郡。深同卑溼陬。炎山長似夏。漲海不知秋。往往鄰鮫室。時時傍蜃樓。賜環如有待。去矣莫夷猶。

吳中立一首

中立字公度。浦城人。隆慶辛未進士。以終養歸。起禮部主事。未赴。遷尙寶司丞。

梁章鉅南浦詩話。公度登隆慶辛未進士。疏請歸養。父沒服闋。應就選。喟然曰。古人爲祿養。今祿不逮親矣。遂絕意仕進。入武夷杜轉巖。構養恬菴而隱焉。張侍讀元忭以詩訪之云。杜轉巖中人。曲江舊同席。未折彭澤腰。早著東山屐。棲心老氏書。結廬武夷側。清峯萬點青。雲溪幾條曲。玄關夾長松。丹房架危壁。巖頭露可餐。巖下芝可摘。猿鶴時爲羣。車馬杳難卽。我本邱壑人。聊佐金門客。煙霞夙同好。出處偶殊迹。諦觀聲利場。何似神仙宅。四十已無聞。百年亦瞬息。脩然赤松子。巢居鍊形魄。明發出國嶺。題詩訂泉石。

遊武夷

溪流寒玉山圍翠。飯熟青精石乳茶。怪得曾孫貪住世。不離煙火是仙家。

秦燿二首

燿字道明。無錫人。隆慶辛未進士。選庶吉士。改兵科給事中。歷刑科。吏科。遷太常少卿。改光祿。擢僉都御史。巡撫南贛。改湖廣。有寄暢園詩集。

清簾

寄暢園二景之一

竹光冷到地。幔卷湘雲綠。隔塢清風來。聲聲戛寒玉。

方揚一首

揚字思善。歙人。隆慶辛未進士。除陝州知州。遷南戶部主事。改隨州知州。歷嘉興同知。進杭州知府。有初菴集十六卷。

冬日同方子及齊王孫吳山人遊牛首

選勝出塵埃。叢林一徑開。雲陰懸石磴。木末起層臺。山帶寒煙暝。江涵夕照來。憑虛望不極。磊砢思難裁。

周光鎬一首

光鎬字國雍。一字耿西。潮陽人。隆慶辛未進士。除甯波推官。遷南戶部主事。改吏部。歷郎中。出爲

順慶知府遷四川副使進參政歷陝西按察使以右僉都御史巡撫甯夏入爲大理寺卿有明農山堂彙草

謁武侯祠

錦江十里錦城東丞相玄堂翠靄中魚水君臣興蜀漢龍蛇風雨走祠宮參天老柏巢雙鶴落日長橋飲斷虹一自杜陵題詠後直令千載泣英雄

王教一首

教字子修淄川人隆慶辛未進士官吏部郎中有銓部集

清風亭對月

永夜不成寐猶憐旅興生何來江上月解作故鄉明別院繁砧響寒雲墮雁聲寥寥杯酒後悽斷若爲情

詹沂一首

沂字浴之宣城人隆慶辛未進士授新建知縣擢南吏科給事中以忤張居正出爲山東僉事旋削職歸起奉化知縣遷禮部主事歷員外遷光祿丞歷南尚寶太常太僕卿進左副都御史有潔身堂集

宣城事函萬歷丙午除夕上謂左右曰此時廷臣受外觀官書帕開宴打鬧惟侍郎楊時喬李廷機副都詹沂三人清寂可念

其爲上知如此。

施宵華謁徐選部不遇詩以慰之

挾策遊燕市。蕭然鬢已疏。不逢楊得意。誰薦馬相如。此日空彈鋏。何門可曳裾。窮途莫漫哭。好返薜蘿居。

謝師啓一首

師啓字叔蒙。蒲圻人。隆慶辛未進士。官參政。

五嶽觀

千山回合繞清溪。落盡桃花路不迷。笙鶴不知何處去。春風只聽子規啼。

宋儒一首

儒字大中。麻哈州人。隆慶辛未進士。選庶吉士。改禮部主事。

慶成宴

金輿玉輦漢郊還。紫殿瓊樓捧御筵。簪珮千官分廣座。笙鏞九奏合鈞天。霞漿共醉蓬萊上。雲祿新開日月邊。天保欣逢魚藻慶。齊將華祝頌堯年。

林章七首

章初名春元。字初文。福清人。萬歷癸酉舉人。有林孝廉集。

小草齋詩話。林春元。才士也。桀驚不羈。常作蛾眉篇。自述其意。才情楚楚。信自可人。

石倉文集。初文才士。不欲以庸孝廉是處。好爲人排難解紛。乃以無心獲罪。謝司寇出之。縲綬之中。適遼海有警。累上書進奇策。願身列戎行。練甲兵。備緩急。爲嫉者所繩。觸憲而死。詩如客情如春草。無處不堪生。無家逢寺好。多病見僧親。曉煙常帶雨。夜月忽噉禽。千山風雨裏。一任子規啼。春風與柳樹。年年是故人。春好年年晚。月寒夜夜秋。皆絕酸楚。

露書。林初文嘗在揚子江中。青山口覆舟。坐皮箱上。見有持紅燈二。從前過。隨木商救之。又嘗夢人贈之以扇。上題茂陵風雨四字。自意不佳。後以上書得禍。因作蛾眉篇云。茂陵風雨千秋夢。揚子波濤一夜悲。

列朝詩集。閩中詩派。宗子羽而福繼之。以樵做蹈襲爲能事。初文才情跌宕。於唐人格律。時欲跳而去之。要能不爲閩派所羈。可謂傑出者也。世宗末。倭寇犯閩。初文年十三。上書督府。求自試行間。既舉於鄉。累上不第。走塞上。從戚大將軍游。座上作灑陽宴別序。酒未三巡。詩序並就。將軍持千金爲壽。緣手散去。挈家寓金陵。憤南曹曲法。斷獄奮臂直之。坐繫獄三年。始去。關白之亂。兩上書請用奇兵。出海上。勦賊。報聞。而繼又抗疏請止礦稅。兼陳立兵行鹽之策。帝感動。下內閣票擬舉行。四明相承中人指。閣其事。密揭請逮治。望闕長歎。憤懣撫膺。卽日下獄。暴病而死。天下惜之。

閩小紀。福唐林春元。七歲能詩。師召試之。適有牧羊者。指爲題。卽應聲曰。三百羣中步獨先。有時高叫白雲天。曾從北海風霜裏。伴過蘇卿十九年。後舉於鄉。更名章。有集行世。才情淒婉。

漁洋詩話。初文有送人詩云。不待春風不待潮。渡江十里九停橈。不知今夜秦淮水。送到揚州第幾橋。以示梅禹金。禹金激賞之。宣城有老儒邱華林。嘗以詩貲禹金。但爲分句讀而已。見而大恚曰。林詩二十八字。正得二十八圈。吾詩字數不啻倍之。乃不得一圈耶。聞者笑之。

田按。初文詩才情俊爽。聲調淒涼。有賈生年少之風。受正平傷生之累。可惜也。

長江一洗六朝兵。江北江南無限情。剩水殘山吳故壘。閒花野草晉空城。石頭古樹逢秋落。浦口寒潮入暮生。最是天涯留滯客。不堪商女蹋歌聲。

潞河驛

冷風殘雪潞河灣。十載家鄉一日還。不作揚雄投漢閣。甯爲樂毅出燕關。漠南廬帳連三輔。海上樓船動百蠻。無路報恩空有劍。春明回首淚潺湲。

居庸關見阻示同行

怪得關前逐客頻。匈奴早晚欲和親。無襦應不空還漢。有舌何須定說秦。雨氣千峯營幕曉。梨花三月塞門春。憑君斗酒城頭話。猶勝新豐店裏人。

酒舍

壚頭竹葉千杯有。扇底桃花四月無。且放歌聲滿天地。莫開醒眼向江湖。南人不復憐鸚鵡。北客何須悵鷓鴣。芳草斜陽看不盡。春明門外獨躊躇。

別妓

畫槳夷猶錦纜迴。美人東上鳳凰臺。朝朝梳洗臨秋水。一路芙蓉不敢開。

崔季鶯

怕教雪落歌應懶。愁作雲飛舞不輕。偷向東風唬柳畔。一行花雨一聲鶯。

楊柳枝

楊柳青。河水濱。春來日日送行人。東風不與長爲主。送盡行人卻送春。

麥應中一首

應中。初名來牟。字孺時。東莞人。萬歷癸酉舉人。

山行

王孫歸路草萋萋。落日青山失舊蹊。直道未應行不得。鷓鴣何事向人啼。

明詩紀事卷十一

庚籤

孫繼皋十二首

繼皋字以德無錫人萬曆甲戌第一人及第授修撰歷諭德庶子少詹事兼侍讀學士遷禮部侍郎改吏部贈禮部尚書有宗伯集十卷

四庫總目繼皋詩文雍容恬雅有承平臺閣之遺風

葉向高蒼霞草孫公論撰溫夷冲粹

田按宗伯五言冲淡有其鄉華子潛風調

送李山人

故人驄馬客春盡一書來分茗供幽事論詩得異才林塘堪下榻風雨且深杯茗水逢新漲孤帆何處開

雨霽有懷錢徵君二首

去住各何意交情中路分長安一夜雨漂泊倍思君樹靄淡初日城陰低暮雲雁鴻那可問空自惜離羣
戶外雨不歇憶君初到時青山一以隔華髮總堪悲世事酒杯過閒情鷗鳥知離居未可道含意爲裁詩

夏日臥病四首

客久堪誰過。官閒穩自慵。琴書供病色。花竹散塵容。晝杳滄洲夢。時尋白鶴蹤。東方有高隱。吾意倘相從。會心那在遠。小築見幽情。過雨宜花事。當風忽鳥鳴。青山供臥起。白日廢逢迎。懶病依然慣。非高吏隱名。不淺煙蘿興。塵中自掩關。詩情消白日。病骨傲青山。野鶴焚香下。閒雲散帙還。浮名將薄宦。吾意有無間。乞假辭朝謁。耽幽學隱淪。病翻思客至。閒不厭官貧。高樹團晴靄。穠花戀晚春。物華偏在眼。肯惜酒杯頻。

送華三還南

彈缺竟何意。挂帆秋滿船。艱難爲客倦。慘淡逐人憐。世路浮雲外。鄉心落日前。西風吹易水。因爾一潸然。

儀封道中

草草出門去。那知成遠遊。風塵難自料。徒御總含愁。有夢依鄉樹。無書報野鷗。歸心指河水。日夜向東流。

舟中漫興

彩鷁去仍還。青林許共攀。愁翻因止酒。病不礙登山。古寺蒼藤路。飛泉白石灣。何妨住十日。與爾聽潺湲。

秋仲龔方伯曠適園社集

水檻秋逾淨。晴郊暑未消。露荷仍的的。風葉自蕭蕭。對酒宜疏豁。參玄契泮寥。城頭暮吹笛。疑有列仙招。

寄酬李宛平內鄉

京兆田郎題柱客。相逢我未厭承明。幾陪韋杜春同醉。一別荆吳歲屢更。丹地不縈歸客夢。滄江難忘故人情。尺書傳字來何處。愁聽流鶯樹裏聲。

余孟麟一首

孟麟字伯祥。江甯人。萬曆甲戌第二人及第。授編修。歷南司業。洗馬。侍讀學士。掌院事。有學士集三十卷。

答張山人

茅檐帶清溪。疏松倚盤石。裊裊挂飛蘿。影入溪水碧。抱獨諒在茲。撫物欣有適。鉤簾聽流鶯。攜琴候逋客。不見白雲歸。惆悵日將夕。

趙南星七首

南星字夢白。高邑人。萬曆甲戌進士。除汝甯推官。入爲戶部主事。改吏部。歷員外郎中。謫平定州判。尋斥爲民。起太常少卿。改右通政。進太常卿。擢工部侍郎。拜左都御史。進吏部尙書。以忤魏忠賢謫戍代州。崇禎初。贈太子太保。諡忠毅。有忠毅集二十四卷。

高攀龍高子遺書。儕鶴先生爲小詞。多寓憂世之懷。酒酣令人歌而和之。慷慨徘徊。不能自已。

姚希孟棘門集。江陵相病。朝士徧走羣望。忠毅趙公與顧公憲成。姜公士昌戒勿往。仍爲紀事詩曰。二豎能憂國。千官爲祝年。

傳播人口。趙公詩步武少陵。淋漓沈痛語。使人欲泣欲嘯。欲縮地而談。欲排閭而懇。易水擊筑之音。於今載見。列朝詩集。夢白公忠強直。負意氣。重然諾。有燕趙節俠悲歌慷慨之風。鄉里後進。依附門下。已而奔趨權利。相背負。酒後耳熱。戟手唾罵。更爲長歌小詞。度語吳歌打棗竿之類。以戲侮之。其人銜之。次骨。夢白不知也。在戍所賦詩飲酒。唾罵笑傲。一如平時。不以謫居畏禍。少有貶損。人謂寇萊公。蘇子瞻無以過也。

王士禛蠶尾續文。高邑趙忠毅公北方偉人。天下望之如泰山北斗。詩長於古選。頗有法度。而又能自見其才思。田按。忠毅三歷銓曹。一爲太宰。激濁揚清。凜不可犯。可謂薑桂之性。老而愈辣。詩亦風骨聳峻。

短歌行

天迴地周。時不我留。少壯易老。胡爲多憂。有客盈堂。有酒盈觴。鏗鐘考鼓。聊爲淫荒。中區迫隘。令我心惻。白雲在天。安得羽翼。功名有數。樂當及時。齒髮一暮。雖悔莫追。愁令霜隕。怒感山傾。不如飲酒。可以樂生。維山有阿。維河有潯。嗟今之人。誰知我心。

長蛇歌飲鄒南皋作

洞庭長蛇一夜枯。千人萬鬼驚歡呼。嶺表流人歸滿塗。今君奉詔來上都。憶昔投荒向萬里。聞君母老復無子。君不識我。我愛君。常恐一旦含冤死。天摧地折白日墮。命寄羣虎欲誰恃。魚龍送君置我前。落日開筵面秋水。平生結交盡賢豪。昨見吳趙今見爾。君亦先曾知我名。獄中得自艾先生。公等袞袞皆大用。海內何愁更不平。長跪進君黃金杯。悲風颯颯從天來。欲飲不飲何爲哉。不見爾鄉劉侍御。白骨今爲螻蟻。

載。

送李修吾謫東昌府推

古人無復望。已愧李司農。斷羽猶爲鳳。批鱗欲觸龍。太平方欲見。狂直合優容。海上憂時者。君門更幾重。

寄魏山人

千里憐同調。春風招隱情。白衣隨野鶴。青眼待狂生。遠水荒煙斷。平林落日橫。何時遊太室。雲外聽吹笙。

寄魏懋權時乃兄以言得罪

浮雲滿天地。吾道竟何其。仕路生俱拙。交情死不疑。鵲鴿君有淚。烏鵲我無枝。昔憶同樽酒。茫茫未可期。

柏鄉送歸德沈龍江相公二首

別深相見一舒顏。末進那堪鬢亦斑。束帛祇妨高臥穩。安車仍與太平還。虛無莫道夔龍業。恍忽初離虎豹關。筋力喜看猶自健。羽儀今日在山間。

飛書作者何男子。善類紛紛畏禍殃。詣闕省郎朝上疏。呼天愛女夜焚香。生還暇恤時艱阨。傳食猶沾帝寵光。留宿柏人無所慮。相望一水卽家鄉。

田按：妖書事起。首輔沈一貫。嫉御史康不揚等。引已罷侍郎郭正域。因以及次輔沈鯉。賴左都御史溫純力持之。東廠太監陳矩亦不聽一貫指。乃以噉生光具獄。正域鯉獲免。此詩飛書作者何男子。善類紛紛畏禍殃。卽指此事也。

李三才二首

三才字道甫臨潼人

題名碑武功右衛軍籍陝西臨潼人明史作順天通州人

萬歷甲戌進士授戶部主事歷郎中謫東昌推

官遷南禮部主事歷郎中出爲山東僉事歷河南參議山東山西副使遷南通政參議召爲大理少卿以右僉都御史總督漕運加戶部尙書以事落職爲民天啓中起南戶部尙書未上卒有雙鶴軒、鶴鵝軒二集

明詩選陳臥子曰修吾雄豪自喜領袖羣倫又能詩耶

田按道甫縱橫之才揮霍自喜廷推閣臣遼陽失陷兩次需用而議不決僅以淮撫老此邊才誦道甫金縉歲月翻挑虜宵旰朝廷已論兵之句爲之拔劍起舞

送張二遊天目魏大同賦

真成南國隱無事北山文酌酒君將去離亭日已曛江清吳市月帆卷富春雲莫復愁孤寂長空足雁羣
冬日同歐楨伯諸公飲李通侯清嘯軒

雨雪江天抱病時衝泥騎馬去何之西園公子頻迎客北海詞人共賦詩草色侵池春意動梅枝照眼驛書遲卻憐獨醒緣何事潦倒從人覆酒卮

李化龍三首

化龍。字于田。長垣人。萬曆甲戌進士。除嵩縣知縣。遷南工部主事。歷郎中。改吏部。出爲河南僉事。遷參議。歷山東副使。河南參政。入爲太僕少卿。遷右通政使。以右僉都御史巡撫遼東。進兵部侍郎。乞歸。起故官。總督湖廣。川貴軍務。兼巡撫四川。再乞歸。起工部侍郎。總理河道。敍平播功。晉兵部尙書。加少保。再加柱國。少傅。兼太子太保。諡襄毅。贈少師。加贈太師。有襄毅詩文集。

明詩統。于田諸作。騁馳騁。金玉陸離。佳製也。

明詩選。陳臥子曰。司馬功名之士。詩亦清脫可誦。

靜志居詩話。于田詩雖沿王。李餘波。然頗爽豁。牧齋錢氏以其爲胡元瑞所稱。譏其醜厚肥臍。而棄之不錄。未免矯枉也。田按。于田播州之功。以一百四十餘日之期。拓千餘里之地。改土設流。建府二州。縣十。可謂偉矣。海龍圍銅標銘云。皇帝二十有八年。播人不軌。天王赫怒。爰整六師。以誅不供。粵有四月。盡俘厥醜。遂躋其宮。方三千里。始入皇封。載勒銅標。永鎮西南。臣李化龍。又收軍前銅鍋。鑄鼎三等。頒發土司。永爲鑒戒。其銘云。維星拱北。惟水朝東。天王御極。八方會同。惟西南夷。各世其封。惟敬天念祖。庶不墜厥宗。順天者吉。逆天者凶。以爲不信。視楊應龍。標今不存。鼎土司中。猶有存者。于田詩頗有豪氣。

金臺篇贈李寶

我昔獻賦燕京道。千載霸業迹如埽。黃沙萬里接胡天。白雲滿地生秋草。李君家在金臺傍。俠遊早擅少年場。爭博不伏魯句踐。擊劍全輕秦武陽。金門十上策不收。脫屣聊爲汗漫遊。無魚不彈馮生鉞。失路還敵季子裘。今來弔古石城下。與君最是知心者。醉後悲歌六代塵。狂來睥睨長江瀉。李君李君且莫論。與

君燕趙氣長存。何處江湖無釣艇。何處茅簷無酒樽。與君明日扁舟去。臂鷹獵兔老山村。

吳明卿東遊泊舟江上同歐楨伯李惟寅方子及攜具訪之

西來一棹下滄波。共識關門紫氣過。七子才名吳質少。六朝詞客秣陵多。江雲入暮依尊酒。浦樹含春起嘯歌。剩有平原十日興。五湖煙月奈君何。

送郎中兵備江西

爲郎十載羨休文。憲府新開列戟分。倚劍共瞻牛斗氣。建牙親統鶴鵝軍。潯陽九派平吞楚。廬嶽千峯半入雲。回首舊遊佳麗地。過江魚雁好相聞。

孫鑛四首

鑛字文融。餘姚人。萬曆甲戌進士。除兵部主事。改禮部。吏部。歷員外郎中。遷太常少卿。右通政。以右副都御史巡撫山東。拜刑部侍郎。改兵部。總督薊遼保定軍務。進右都御史。革職聽勘。起南右都御史。就遷兵部尚書。參贊機務。加太子少保。有月峯先生集十二卷。

靜志居詩話。月峯勤學過於士安。慧業不如靈運。觀其論詩有云。韓退之於詩本無所解。宋人目爲大家。直是勢利他耳。是何言與。戶俊所云。松柏之風。不知堂密之有美樞者也。

田按。月峯與余君房論文書云。王元美謂昌黎於詩無所解。卽鄙見亦謂然。昨偶看古詩一二篇。弇州如何能到。竹垞之譏月峯。是未見月峯全集也。月峯齋中偶成詩云。吟詩遠遜歷城李。作字猶慚鄆縣豐。其自知審矣。

遠覽樓

壯邑城雙峙。奔流江九迴。閨閣接地起。舸艦逐潮來。爽氣三秋勝。雄觀百里開。可憐枯旱後。田野半蒿萊。

陪省寮遊蓮花菴

野水通靈沼。雲房傍帝家。同官俱載酒。乘興一看花。園熟供嘗果。冰寒可浸瓜。山公正耽飲。馬足莫愁賒。

與客談邊事

腥羶款塞緣何策。西北銷兵已六年。馬市約期招虜入。龍廷講佛乞僧傳。射聲校尉晨搖珮。游擊將軍夜啓筵。聞說雲中遭歲歉。夷王猶給救荒錢。

題畫

虛閣全當水面風。曉來山色望朦朧。白鷗江上幽人思。都在輕煙細雨中。

呂坤一首

坤字叔簡甯陵人。萬歷甲戌進士。除襄垣知縣。改大同。入爲吏部主事。歷員外郎中。出爲山東參政。歷山西按察使。陝西布政使。以右僉都御史巡撫山東。拜刑部侍郎。有去僞齋集十卷。

列朝詩集侍郎數歷中外。所至有聲跡。講求經濟實學。皆可施行。萬歷中。鄭貴妃方擅寵。撰女誡一書。以明德馬后爲首。侍郎序而刻之。坐此爲朝論所譁。不得大用。君子惜之。生平不求工聲律。新樂府記載時事。有古人諷諭之風。

豫國士

身可漆。炭可吞。啞癩何足辭。難酬國士恩。君頭爲飲器。安用我頭存。橋下廁中誰在此。義士甘心趙襄子。君不見東鄰再嫁妻。能爲後夫死。

謝杰三首

杰字漢甫。長樂人。萬歷甲戌進士。除行人。歷兩京太常少卿。累遷順天府尹。以右副都御史巡撫南贛。進南刑部侍郎。改北。擢戶部尙書。有天靈山人集二十卷。

送蔡侍御謫尉馬邑

馬邑神仙尉。烏臺侍從臣。片言思悟主。三疏竟危身。花暗邊城雨。葭迴黍谷春。鳳雛雖鍛羽。終不落風塵。

宮人斜

埋玉空山土一坏。落花飛盡水悠悠。年年酒作啼鶻血。遺恨春風十二樓。

送游太初歸蜀

杜子堂西萬里橋。使君歸去馬蹏驕。詩成莫向啼鶻賦。望帝春魂恐未銷。

李堯民五首

堯民字耕堯。濟甯州人。萬歷甲戌進士。除長洲知縣。改永年。遷御史。歷大理丞。進本寺少卿。遷應

天府尹有快獨集十八卷

大泌山房集耕堯近體朗秀

獨飲

牢落停雲徑。淒其問字廬。坐看秋已暮。不醉欲何如。菊在聊親酒。玄成且罷書。一聲天外唳。孤雁又愁予。久雨忽晴晚坐

雲洗星初霽。煙霏雨乍收。誰來共明月。獨坐一丹邱。遠杵寒相答。孤鴻迥自愁。可知蕭瑟意。不是爲悲秋。題刁稚渠園亭

背郭園成二百弓。鶯花無數水雲封。山銜堞影當軒霽。雨挾松陰入徑濃。坐領青霞供藻詠。醉攜明月度芙蓉。丹邱只在衡門裏。汗漫何煩五嶽蹤。

送于駕部文若之中州河憲

梁園春散吹臺空。且急宣房瓠子宮。只恐彩毫閒不得。青霞片片落天風。

侯中鵠趙庭言期臘夜文酒不果

月破霜空雪不分。一尊親自領寒雲。如何客有山陰興。夜半無舟御李君。

支大綸一首

大綸字心易嘉善人萬歷甲戌進士除南昌教授遷泉州推官謫江西布政司理問遷奉新知縣有華平先生集五十二卷

田按心易仕宦不達集中自述多恩怨之詞所著水昭二陵編年史沈景倩野獲編痛詆之觀其論大禮以永嘉爲是新都爲非所見顛倒如此安能執筆而從南董之後乎

寄水部章循之

灑巾濁酒甕頭眠白眼逢人氣巖然借問陽冰依幕客只今誰似李青蓮

曾夢鼇一首

夢鼇字君瞻莆田人萬歷甲戌進士官甯海知縣

金陵懷古

萬雉名都尙儼然銷沈王氣轉堪憐鹿遊故苑春苔滿鳳去空臺夜月懸六代寢陵迷宿草五侯第宅付荒煙鶯花不管興亡事點綴風光自歲年

林纘振一首

纘振字公悅漳浦人萬歷甲戌進士官工部主事有梅雲館集

東南嶠外詩話公悅卒年僅二十七官軍來一詩佳甚

官軍來

官軍來。官軍來。昨日江頭賊已回。將軍逐賊未百里。將臺先向江頭開。戟手罵賊奴。恨不蹴爾成塵灰。父老向前云。將軍幸勿噴。江頭賊過遺煙燼。江邊剝戮餘千人。殺者不可救。骸骨空爲塵。何不割取獻幕府。軍校猶博首虜銀。君不見往年之捷亦如此。石壁城中二百家。三百丁夫同日死。總戎腰玉衣。蟒衣擊鼓傳觴奏凱歸。海外孤城未解圍。

顧國輔一首

國輔榜姓張

字惟德。南京金吾後衛人。萬曆甲戌進士。授刑部主事。歷郎中。出爲襄陽知府。遷浙江

副使。謫寶慶知府。

嘉善寺石壁

千林雨氣清。新松藹如沐。蒼厓倏焉剖。神秀勢超豁。巨靈何年來。揮斤剡山骨。森然萬奇鬼。鬢鬢互相逐。崕呀砮中開。玲瓏竅蒼玉。地僻知者稀。因之遠置黷。吾將謝纓組。歸來臥茲麓。

林兆珂四首

兆珂。字孟鳴。莆田人。萬曆甲戌進士。除蒙城知縣。遷刑部主事。歷郎中。出爲廉州知府。改衡州。安慶。有挈朋草。

四庫總目。光珂七律。頗得錢。劉風調。

關陔詩話。孟鳴詩。醞釀深厚。吐納風流。

田按。孟鳴嘗刻黃白仲詩集。頗稱好事。詩亦點化生新。如但拚得失甯論馬。豈爲公私故問蛙。入夢遽然誰辨蝶。出遊樂矣我知魚。幾忘其爲習見故事也。

雜感

中夜不能寐。起步庭南隅。秋容何慘烈。嚴雪沾我裾。嗟哉芳樹林。銷落在須臾。有生胡不適。安有再來軀。蜉蝣矜羽翼。薨薨何其愚。

病起漫成

習靜疏朝謁。庭莎過雨新。鶴形甯怯瘦。龍性故難馴。問道無河伯。全生有谷神。閒曹堪寄傲。何必嘆前薪。閒居書事

會心豈在遠。咫尺卽濠梁。鳥下窺細帙。花飛點石床。無懷堪命氏。何有欲名鄉。漫道潘郎拙。閒居趣自長。晚渡羅江卽事

雨散千峯日漸吞。數家煙火澹孤村。微波弄月潮初上。遠浦歸雲樹半昏。浣女踏歌喧古渡。舟人指點話仙源。宦情惟有羅江識。欲取鴟夷作酒尊。

游朴一首

朴，字太初，福甯州人。萬曆甲戌進士。除成都推官，入爲大理評事。累官湖廣布政使。有藏山集。
白石舟中簡沈比部

蒼茫寒日暮，繫楫楚江門。共惜諸賢去，誰招九辨魂。客途還自遣，時事不堪論。嶺表多醇酒，愁時進一尊。
朱期至一首

期至，字子得，蘄水人。萬曆甲戌進士。除戶部主事，歷員外郎中。終懷慶知府。有王屋山人集。
送胡之驥歸里

雨雪千村暮，江城一騎還。故人疏白髮，吾意卜青山。游俠愁看劍，風塵強破顏。囊中詩句在，那惜路閒關。
伍讓一首

讓，字子謙，衡陽人。萬曆甲戌進士。除中書舍人，遷刑部員外，改禮部。出爲雲南僉事，改貴州。歷河南參議，江西副使。

贈濟上人

深居不用買青山，飛錫煙霞此閉關。香閣旂檀諸品淨，六時鐘磬老僧閒。眼看分竹成龍種，手自栽松待鶴還。借問禪心何所似，白雲無繫水潺湲。

曹一夔一首

一夔字雙華武岡州人萬歷甲戌進士除行人遷御史出爲浙江僉事有虛白堂集

寶方山

洞門瑤草白雲深千樹萬樹綠森森石床丹竈空流水試問仙人何處尋

鄭須德一首

須德字存修莆田人萬歷丙子舉人官彭縣知縣有綠野堂集

采蓮曲

湖水綠於染小艇輕似葉十五採蓮女嬌歌搖短楫逢郎卻不語郎去轉眉睫

黃閣一首

閣字啓崇莆田人萬歷丙子舉人官永安知州

蘭陔詩話啓崇精繪事不爲形似自成一家

遊雙明洞

探蹟地靈古招提逸興開岩幽晴帶雨湍激水鳴雷落日麋猿嘯空山雲樹迴眼前無俗慮扶病一登臺

麥秀歧二首

秀歧字德徵南海人萬歷丙子舉人官萬年知縣有澹遠堂稿

越王臺

黃屋何年易故宮。荒臺登眺起悲風。函關鹿走秦封割。沛水龍興漢使通。城市萬家煙樹合。江山千載霧
圖空。松杉不解滄桑事。依舊寒原自鬱葱。

鎮海樓

松濤滿壑散炎埃。飛閣凌虛爽氣開。滄海波光侵檻入。白雲山色隔城來。煙光寂寞呼鸞道。古木蕭疏朝
漢臺。徙倚休裁王粲賦。故園風景且銜杯。

黃朝賓一首

朝賓字伯遷。廣州順德人。萬歷丙子舉人。官長泰教諭。有山石洞稿。

送陳山人讀書羅浮

四百峯高日月迴。囊書從此謝氛埃。遙分木客藤蘿幔。更上麻姑錦繡臺。石臼曉春紅翠鳥名響。玉笙宵奏
鳳凰來。澄心靜夜丹光裏。七十璇房次第開。

專

